

四庫全書

集部

欽定四庫全書

集部

施註蘇詩卷十七

詳校官庶吉士臣李傳熊

檢討臣何思鈞覆勘

覆校官中書臣宋 鎔

校對官主事臣龔敬身

謄錄監生臣范鳴謙

欽定四庫全書

施註蘇詩卷十七

宋 蘇軾 撰

施元之原註

武進邵長蘅刪補

詩四十一首

起元豐二年己未守吳興即以是年八月  
攝赴臺獄十二月謫官黃州洎庚申春自

京師赴

黃作

李公擇過高郵見施大夫與孫莘老賞花詩  
憶與僕去歲會于彭門折花餽筍故事作詩  
二十四韻見戲依韻奉答亦以戲公擇云

汝陽真天人絹帽著紅槿纏頭三百萬不買一笑哂  
共誇青山峰曲盡花不隕當時謫仙人逸韻謝封畛  
詩成天一笑萬象解寒窘驚開小桃杏不待雷發軫  
餘波尚涓滴乞與居易稔爾來誰復見前輩風流盡  
寂寞兩詩人殘紅對櫻筍饑腸得一醉妙語傳不泯

君來恨不與去更復相牽引我老心已灰空煩扇餘

燼天游照六鑿虛空掃无物懸知色竟空那復嗜烏

吻蕭然一方丈居士老龐蘊散花從滿祴不答天女

問故人猶故目怨句寫餘懷疑我此心在遮防費欄

楯應虞已斃蛇折尾時一蠹仄聞孟光賢未學處仲

忍

公自注開閣放出事見本傳

寄招應已足左右侍雲鬢何時花

月夜羊酒謝不敏此生如幻耳戲語君勿愠應同亡

是公一對子虛听

杜子美八哀詩汝陽讓帝子眉宇真天人又詩每蒙天  
一笑復似物皆春南宮羯鼓錄汝陽王璣玄宗鍾愛之  
每游幸傾刻不捨璣嘗戴硃帽打曲上自摘紅檀花  
一朵置帽上簷處二物皆滑久之方安遂奏舞山香一  
曲花不墜落上大笑賜璣金器宗開府與玄宗論鼓事  
上曰頭如青山峰手如白雨點即羯鼓之能事山峰取  
不動雨點取碎急互見七卷有美堂暴雨詩注楊妃外  
傳上羯鼓罷戲秦國請纓頭對曰豈有大唐天子姨無  
錢用耶遂出三百萬為一局上與妃子在沈香亭命樂  
工李龜年持金花牋召李白進清平調詞白承詔旨猶  
苦宿醒因援筆賦之上命龜年以歌妃笑領歌意尚書  
禹貢餘波入於流沙左傳僖二十三年晉公子重耳曰  
其波及晉國者君之餘也唐白居易傳初與元稹詩  
故號元白南史張融卒其從弟弔之曰阿兄風流頓盡  
王注兩詩人指華老施大夫也唐宰相有櫻筍厨三月  
為最盛左傳襄十三年鄭石臬曰使歸而廢其使怨其

君以疾其大夫而相牽引也不猶愈乎莊子庚桑楚身  
若槁木之枝心若死灰若是者禍亦不至福亦不來左  
傳成二年齊賓媚人請收合餘燼背城借一六鑿出莊  
子外物篇注已見史記蘇秦傳饑人餓而不食烏喙者  
為其愈充腹而與餓死同患也宋齊邱化書躑躅之酒  
烏喙之脯初嗽之若芥再嗽之若黍復啖之若丸又啖  
之若脯淮南子聖人處環堵之室高誘註曰堵長一丈  
高一丈面環一堵為方丈傳燈錄居士龐蘊少悟塵勞  
志求真諦散花天女出維摩經詳見十三卷坐上賦戴  
花詩注杜子美義鶻行白蛇登其巢吞噬恣朝食又折  
尾時一掉飢腸皆已穿晉王敦傳字處仲王愷置酒敦  
與王導俱在坐有女妓吹笛小失聲韻愷便毆殺一生  
改容敦神色自若又愷使美人行酒客飲不盡輒殺之  
酒至敦故不肖持美人悲懼失色而敦愷然不顧導遂  
嘆曰處仲若當世心懷剛忍非令終也又嘗荒恣於色  
體為之弊左右諫之曰此甚易耳乃開後閣驅婢妾數

十人放之毛詩鬢髮如雲古樂府有春江花月夜篇漢司馬相如傳亡是公亡是人也又亡是公听然而笑

王鞏清虛堂

清虛堂裏王居士閉眼觀身心

一作

如止水水中照見萬

象空敢問堂中誰隱几吳興太守老且病堆案滿前長  
渴睡願君勿笑反自觀夢幻去來殊未已長疑安石恐  
不免未信犀首終無事勿將一念住清虛居士與我蓋  
同耳

楞嚴經月光童子白佛言有佛出世名為水天教諸菩薩修習水觀我於是時室中安禪我有弟子闍毘觀室



惟見清水遍在室中莊子齊物論南郭子綦隱几而坐  
再見晉謝安傳安石妻劉惔妹也見家門富貴而安獨  
靜退乃曰丈夫不如此也安石掩鼻曰恐不免耳史記  
陳軫傳謂犀首曰公何好飲也犀首曰無事也再見

和孫同年下山龍洞禱晴

吳興連月雨釜甑生魚蛙往問卞山龍曷不安厥家梯  
空尚巉絕俯視驚谿谷神井湧雲蓋陰崖垂蘚花交流  
百道泉赴谷走羣蛇不知落何處隱隱如縑車我來叩  
石戶飛鼠翻白鴉寄語洞中龍睡味豈不嘉雨師少弭  
節雷師亦停橈積水得反壑稻苗出泥沙農夫免菜色

龍亦飽豚豕看君擁黃紬高臥放晚衙

戰國策知伯攻趙城水不沒者三版白竈生鼃人馬相食晉成公絞陰霖賦沈竈生蛙中庭運舟釜魚用范丹事已見李白詩仙鼠如白鴉仙經蝙蝠一名仙鼠千歲之後體白如雪棲則倒懸禰衡傳注撾擊鼓杖也禮記歲十二月土反其宅水歸其壑白樂天詩暖閣謀宵宴寒庭放晚衙倦游錄文潞公初知榆次縣題詩於新衙鼓上云置向樵樓一任撾撾多撾少不知他如今幸有黃紬被努出頭來道放衙

乘舟過賈收水閣收不在見其子三首

賈收字耘老吳

興人

愛酒陶元亮能詩張志和青山來水檻白雨滿漁簑淚

垢添丁面貧低舉案蛾不知何所樂竟夕獨酣歌

五柳先生傳性嗜酒而家貧不能恒得親舊知其如此或置酒招之造飲輒盡期在必醉唐書張志和金華人適居江湖自稱煙波釣徒亦號玄真子顏真卿刺湖為更易敝舟浮家汎宅往來苕雪間嘗撰漁歌兼工山水酒酣舐筆輒成憲宗命圖其像求之不能致盧仝詩莫怪添丁即淚下作面垢添丁兒名也白樂天效陶詩客去有餘趣竟夕獨酣歌

嫋嫋風蒲亂猗猗水荇長小舟浮鴨綠大杓瀉鵝黃得意詩酒社終身魚稻鄉樂哉無一事何處不清涼

楚詞嫋嫋兮秋風詩國風瞻彼淇澳綠竹猗猗杜子美詩水荇牽風翠帶長唐東夷傳高麗馬訾水出白山色

若鴨頭號鴨綠水大杓暗用  
晉人事鵝黃用杜詩竝已見

曳杖青苔岸繫船枯柳根德公方上塚李路獨畱言已  
占蒲魚港更開松菊園從茲來往數兒女自鷹門

裏陽記司馬德操諸龐公值其波沔上先人墓注再見  
陶潛歸去來辭三徑就荒松菊猶存杜詩臘藥能無婦  
鷹門幸有兒晉書李密  
傳鷹門無三尺之童

次韻孫祕丞見贈

感慨清衷似變風老於詩句耳偏聰迂疎自笑成何事  
冷淡誰能用許功不怕飛蚊如立豹肯隨白鳥過垂虹

吟哦相對忘三伏擬泛冰谿入雪宮

公自注湖州多蚊  
蚋豹脚尤毒垂虹

吳江  
亭名

冷淡用白樂天冷淡生活語詳見十卷游廬山次韻夏  
小正白鳥蚊蚋也金樓子白鳥蚊也齊桓公臥栢寢謂  
仲父曰一物失所寡人悒悒今白鳥營營是必饑耳因  
開翠紗厨進之歷忌釋伏者何也金氣伏藏之日也金  
畏於火故至庚日必伏陰陽書後夏至後第三庚為初  
伏四庚為中伏立秋後初庚為終伏故謂之三伏王注  
世謂湖州為水精宮言其四面皆水雪宮借用孟子字

與客游道場何山得鳥字

清谿到山盡飛路盤空小紅亭與白塔隱見喬木杪中

休得小巷孤絕寄雲表洞庭在北戶雲水天渺渺菴僧  
俗緣盡淨業洗未了十年畫鵲竹益以詩自繞高堂儼  
像設禪室各深窈奔泉何處來華屋過谿沼何山隔幽  
谷去路清且悄長松度翠蔓絕壁挂唬鳥我友自杭來  
尚歎所歷少歸途風雨作一洗紅日燎俄驚萬竅號黑  
霧岑蓬蓼舟人紛變色坐羨輕鷗矯我獨喚酒杯醉死  
勝流殍書生例強很造物空煩擾更將掀舞勢把燭畫  
風篠美人為破顏正似腰支弱明朝更陳迹清景墮空

杏作詩記餘歡萬古一昏曉

吳興統記郡有五亭曰白蘋亭集芳亭山光亭朝發亭  
碧波亭又有白塔巷有白石塔在焉因名楚辭招魂像  
設君室靜閒安些括地志何山本名金蓋山晉何楷居  
此習業後為吳興太守改為何山唐傳奕傳自為墓志  
云青山白雲  
人也以醉死

僕去杭五年吳中仍歲大饑疫故人往往逝去  
聞湖上僧舍不復往日繁麗獨淨慈本長老學  
者益盛作詩寄之

來往三吳一夢閒故人半作冢纍然獨依舊社傳真法

要與遺民度厄年趙叟近聞還印綬竺翁先已反林泉  
何時策杖相隨去任性逍遙不學禪

朱長文吳郡圖經續記漢永建四年分會稽為吳郡以  
淞江中流為界晉宋齊梁陳之間雖頗割地而不改與  
吳興丹陽號為三吳神仙傳丁令威云何不學仙冢壘  
壘左傳閔二年衛之遺民男女七百有三十人漢王莽  
傳莽下書曰予遭陽九之厄百六之會國用不足民人  
騷動今既會已度趙叟謂趙清獻公朴前一歲以宮師  
致仕竺翁指  
淨慈本長老

舶棹風

并引

吳中梅雨既過颯然清風彌旬歲歲如此湖人謂



之舶趁風是時海舶初回云此風自海上與舶俱  
至云爾

三旬已過黃梅雨萬里初來舶趁風幾處縈回度山曲  
一時清駛滿江東驚飄款款先秋葉喚醒昏昏嗜睡翁  
欲作蘭臺快哉賦卻嫌分別問雌雄

宋玉風賦楚襄王遊於蘭臺之宮有風颯然而至乃披  
襟當之曰快哉此風寡人所與庶人共者耶玉對曰此  
獨大王之風耳庶人安得而共之曰豈有說乎玉曰發  
明耳目寧體便人此大王之雄風也  
雌風  
此庶人之雌風

丁公默送蝓蚌

溪邊石蟹小如錢喜見輪囷赤玉盤  
半殼含黃宜點酒兩螯斫雪勸加餐  
蠻珍海錯聞名久怪雨腥風入坐寒  
堪笑吳興饒太守一詩換得兩尖團

胡越風物志蝓蚌并贅十足生海邊  
泥穴中潮退採取之四時常有雌者  
幣大而肥重者踰數斤去幣渾渾煮熟  
分擘薦酒切為羹其小而黃者謂之石  
蝓蚌肉硬幣於檢切酉陽雜俎蝓蚌大  
者長尺餘兩螯最強鄆縣昔有人於水  
際泥穴採取之為螯所翦夾有頃而死  
至今呼此為蝓蚌洲

送孫著作赴考城兼寄錢醇老李邦直二君於

孫處有書見及

使君閑如雲欲出誰伴清風獨無事一嘯亦可喚來  
從白蘋洲吹我明月觀門前遠行客青衫流白汗問子  
何怱怱王事不可緩故人錢與李清廟兩圭瓚蔚為華  
乘器尚記溝中斷子亦東南珍價重不可算別情何以  
慰酒盡對空案惟持一榻涼勸子巾少岸此風那復有  
塵土飛灰炭欲寄二大夫發發不可絆

後漢方術傳趙炳嘗臨水求度船人不知之炳乃張蓋  
坐其中長嘯呼風亂流而濟注和猶許也俗本作知者

誤李方直白蘋亭記洲在郡城南東亂雪溪據洲之陽  
揭大亭一焉一曰梁柳惲為吳興太守賦詩於此因以  
名洲清廟詩頌篇名尚書平王錫晉文侯拒邑圭瓚孔  
氏云以圭為杓柄謂之圭瓚漢鄒陽傳蟠木根柢輪因  
離奇而為萬乘器者以左右先為之容也莊子天地篇  
百年之木破為犧樽青黃而文之其斷在溝中比犧樽  
於溝中之斷則美惡有閒矣其於失  
性一也詩小雅南山烈烈飄風發發

泛舟城南會者五人分韻賦詩得人皆苦炎字

四首

城中樓閣似魚鱗不見清風起白蘋試選苔谿最深處  
仍呼我輩不羈人窺船野鶴何曾下見燭飛蟲空自馴

遠郭荷花一千頃誰知六月下塘春

劉禹錫湖州詩酒對青山月琴韻白蘋風孟東野送陸暢歸湖州詩渺渺雲谿前白蘋多清風韓退之送惠師詩惠師浮屠者乃是不羈人白樂天餘杭詩遠郭荷花三十里按今震澤以南派太湖之水亂苔雲二谿以通舟楫東盡吳興西盡餘杭名曰下塘

苦熱誠知處處皆何當危坐學心齋海螯要共詩人把谿月行遭霧雨霾鄉國飄零斷書信弟兄流落隔江淮便應築室苔谿上荷葉遮門水浸堦

管子弟子職篇危坐鄉師顏色毋怍後漢茅容避雨樹下危坐愈恭莊子人間世顏回曰敢問心齋仲尼曰唯

道集虛虛者心齊也把螯用  
畢卓左手持蟹螯語注已見

紫螭鱸魚賤如土得錢相付何曾數碧筩時作象鼻彎  
白酒微帶荷心苦運肘風生看斫鱸隨刀雪落驚飛縷  
不將醉語作新詩飽食應慙腹如鼓

後漢謠河間說女工數錢酉陽雜俎魏正始中鄭公愷  
守濟南夏日率僚佐避暑於歷城之北使君林下以大  
荷葉酌酒以簪刺其心令與柄通莖上輪囷如象鼻傳  
飲之名碧筩杯歷下學之言酒味雜蓮氣香冷勝於冰  
賓子野酒譜亦云白樂天詩味苦蓮心小漿沽蔗節稠  
杜子美設罾歌無聲細下飛碎雪又詩刀鳴繪縷飛張  
景陽七命乃命支離飛霜鏐紅肌綺散素膚雪落西陽  
雜俎南孝廉者善斫鱸殼薄絲縷因會客忽雷震鱸悲

化為蜉蝣  
蝶飛去

橋上游人夜未厭共依水檻立風簷樓中煮酒初嘗芡  
月夜新粧半出簾南郭清游繼顏謝北牕歸臥等羲炎  
人間寒熱無窮事自笑疎頑不受疔

顧況湖州刺史聽記在晉則謝安謝萬王羲之獻之國  
朝則顏魯公左傳昭二十年齊侯疥遂疔杜預曰疔瘡  
也後漢景丹傳壯士不病瘡

贈王郎一首

一作與王郎夜飲井水此詩墨蹟  
刻石成都帖而集中失載王郎乃

子由婿子立也是  
時從先生於吳興

吳興六月水泉溫千頃菰蒲聚鬪蚊此井獨能深一丈

關

一作源龍如我亦知君

次韻李公擇梅花

詩人固長貧日午饑未動偶然得一飽萬象困嘲弄尋  
花不論命愛雪長恐凍天公非不憐聽飽即喧闐君為  
三郡守所至滿賓從江湖常在眼詩酒事豪縱奉使今  
折磨清比於陵仲永懷茶山下攜妓修春貢更憶檻泉  
亭插花雲髻重蕭然臥瀟灑愁聽春禽哢忽見早梅花



不飲但孤諷詩成獨寄我字字愈頭痛嗟君本侍臣筆  
橐從上雍脫鞞吟芍藥給札賦雲夢何人慰流落嘉謫  
天為種杯傾笛中吟帽拂果下鞵感時念羈旅此意吾  
儕共故山亦何有桐花集幺鳳君亦憶匡廬歸掃藏書  
洞何當種此花各抱漢陰鑿

韓退之嘲少年詩直把春償酒都將命乞花孟東野詩  
文士莫辭酒詩人命屬花高士傳陳仲字子終適楚居  
於陵列女傳楚王欲以子終為相入告於妻妻曰亂世  
多害於是相與逃而為人灌園張君房勝說湖州長城  
縣啄木嶺金沙泉每歲造茶之所也泉處沙中居常無  
水湖常二郡守至於境會亭具犧牲拜教祭泉其夕清

溢及造茶畢水即微減供堂者畢水已半之太守造畢  
即涸矣守或還飾稽晚則有風雷之變云爾雅檻泉正  
出正出者湧出也三國志魏太祖先苦頭風臥讀陳琳  
所作檄翕然而起曰此愈我病數加厚賜見王粲傳注  
漢趙充國傳張安世本持橐籥筆從事武帝數十年注  
橐籥囊也近居負橐籥筆從備顧問或有所紀也漢司  
馬遷傳報任安書云迫季冬僕又薄從上上雍楊妃外  
傳開元中植木芍藥於沈香亭前會花繁開召李白立  
進清平調詞上自是顧李翰林異于他學士會高力士  
以脫鞵為恥摘其詞以激楊妃帝欲官白妃輒沮止漢  
司馬相如傳請為天子游獵之賦上令尚書給筆札賦  
云楚有七澤嘗見其一未覩其餘也臣之所見蓋特其  
小小者爾名曰雲夢雲夢者方九百里杜荀鶴梅花詩  
謝公吟賞愁飄落可得更拈長笛吹撫遺蜀州紅梅閣  
東壁有詩泥伏高樓莫吹笛大家畱取倚闌干因笛中  
有落梅曲故云後漢歲貊獻果下馬高三尺乘之可於

果樹下行王注西蜀有桐花鳥似鳳而小人謂之倒挂  
子先生梅詞所謂倒挂綠毛幺鳳是也先生李氏山房  
記公擇少時讀書於廬山五老峰下白石菴之僧舍藏  
書凡九千餘卷莊子天地篇漢陰丈人方將為圓畦鑿  
隧而入井抱甕而出灌搢  
搢然用力多而見功寡

### 送淵師歸徑山

我昔嘗為徑山客至今詩筆餘山色師住此山三十年  
妙語應須得山骨谿城六月水雲蒸飛蚊猛捷如花鷹  
羨師方丈冰雪冷蘭膏不動長明燈山中故人知我至  
爭來問訊今何似為言百事不如人兩眼猶能書細字

公自注徑山夏無蚊余舊詩云問  
龍乞水歸洗眼欲看細字銷殘年

傳燈錄達摩欲返西竺命門人各言所得乃謂道育曰  
汝得吾骨最後慧可禮拜依位而立祖曰汝得吾髓

送表忠觀錢道士歸杭

并引

通教自杭來見余於吳興問觀亦卒工乎曰未也  
杭人比歲不登莫有助我者余曰異哉杭人重施  
輕財是不獨為福田今歲成矣其行乎及還作詩

送之

集中不載此引道士吳大錢之弟子也嘗見  
墨跡今錄公表忠觀碑載趙抃知杭州言故

吳越國王錢氏墳廟在錢塘臨安者皆蕪廢不  
治請以妙因院為觀使錢氏之孫為道士曰自

然者居之以守其墳廟詔許之改妙因為表  
忠觀錢道士即碑中名自然者號通教大師

先王舊德在民心著令稱忠上意深墮淚行看會祠下  
挂名爭欲刻碑陰淒涼破屋塵凝坐憔悴雲孫雪滿簪  
未信諸豪容郭解卻從他縣施千金

漢書吳芮傳徙為長沙王薨諡曰文王初文王芮高祖  
賢之制詔御史長沙王忠其定著令注漢約非劉氏不  
王而芮王故著令中使特王也或曰以芮至忠故著令  
也晉羊祜傳襄陽百姓於峴山祜平生游憩之所建碑  
立廟歲時饗祭焉望其碑者莫不流涕杜預因名為墮  
淚碑漢郭解傳洛陽人有相仇者邑中賢豪居間以十  
數終不聽客乃見解解夜見仇家仇家曲聽解解曰今  
子幸而聽我奈何從他縣奪人邑賢士大夫權乎迺夜

去不使人知使

次韻周開祖長官見寄

墨迹藏吳興向氏前題云次韻奉和樂清開祖

長官見寄後題云元豐二年六月十三日吳興郡齋作旋見兒童迎細侯墨迹作已見當

是續改此一字

俯仰東西閱數州老於岐路豈伶優初聞父老推謝令  
旋一作已見兒童迎細侯政拙年年祈水旱民勞處處避

嘲謳河吞巨野那容塞盜入蒙山不易搜仕道固應慙  
孔孟扶顛未可責求由漸謀田舍猶懷祿未脫風濤且

傍洲惘惘可憐真喪狗時時相觸是虛舟  
竭來震澤都如夢只有苕溪可倚樓  
齋釀酸甜如蜜水樂工零落似

風甌

疑作鷗

遠思顏柳并諸謝近憶張陳與老劉

公自注謂張子

野陳令舉劉孝叔

風定軒牕飛豹腳雨餘欄檻上蝸牛  
舊游到

處皆蒼蘚同甲惟君尚黑頭憶昔湖山共尋勝相逢杯酒兩忘憂  
醉看梅雪清香過夜棹風船駭汗流百首共成山上集  
三人俱作月中遊海南未起垂天翼澗底仍依徑寸  
庀已許春風歸過我預憂詩筆老難酬此生歲

月行飄忽晚節功名亦謬悠犀首正緣無事飲馮驩應  
為有魚留從今更踏青州麴薄酒知君笑督郵

晉書循吏傳鄧攸為吳郡守刑政清明後稱疾去職百  
姓數千人畱牽攸船不得進攸乃小停夜中發去吳人  
歌之曰統如打五鼓難鳴天欲曙鄧侯挽不留謝令推  
不去又互見前注後漢郭伋字細侯為并州牧始至行  
部到西河美稷有兒童數百各騎竹馬道次拜迎漢溝  
洫志考武元光中河決於瓠子東南注距野塞之輒復  
壞莊子庚桑楚汝士人哉惘惘乎欲反汝情性而無由  
入可憐哉史記孔子獨立郭東門鄭人曰東門有人其  
顙似堯其項類皋陶其肩類子產然自腰以下不及禹  
三寸累累若喪家之狗莊子山木篇方舟而濟於河有  
虛船來觸舟雖有偏心之人不怒吳興詩序東晉王謝  
諸公莫不游而樂之而城中觀游之最則水堂見於柳



憚若顏真卿之忠毅又不獨以篇詠著左太冲詠史詩  
鬱鬱澗底松離離山上苗以彼徑寸莖蔭此百尺條再  
見犀首注屢見史記孟嘗君傳馮驩居孟嘗傳舍彈其  
劍而歌曰長鋏歸來乎食無魚孟嘗君遷之幸舍食有  
魚矣青州督郵用世說桓溫主簿事詳見十五卷九日  
次韻王鞏詩注公烏臺詩話軾知湖州有周邠作詩寄  
軾軾答云云自言遷徙數州未蒙朝廷擢用老於道路  
并所至遇水旱盜賊夫役數起民蒙其害以譏諷朝廷  
政事闕失并新法不便之所致也仕道云云以言已仕  
而道不行則非事道也故有慙於孔孟孔子責由求云  
顛而不扶意以譏諷朝廷大臣不能扶正具顛仆也

林子中以詩寄文與可及余與可既沒追和其

韻

斯人所甚厭投畀每不受欲其少須臾奪去惟恐後云  
誰尸此職無乃亦假守賦才有巨細無異斛與斗胡不  
安其分但聽物所誘時來各飛動意合無妍醜坐令雞  
栖車長載朱伯厚平生無一旅既死咤萬口自聞與可  
亡胸臆生堆阜懸知臨絕意要我一執手相望五百里  
安得自其牖遺文付來哲後事待諸友伶俜嵇紹孤老  
病孟光偶世人賤目見爭笑千金帚君詩與楚詞識者  
當有取但知愛墨竹此歎吾已久故人多厚祿能復哀

君否不見林與蘇饑寒自奔走

詩卷伯篇取彼諧人投畀有北有北不受漢賈山傳願少須臾毋死唐楊綰傳綰亮帝曰何奪綰之速耶漢項籍傳注假守兼守也後漢朱震字伯厚為州從事奏濟陰太守單匡臧罪帝收匡下廷尉諍曰車如雞栖馬如狗疾惡如風朱伯厚左傳哀元有衆一旅杜預曰五百人為旅晉山濤傳與嵇康善康臨誅謂子紹曰巨源在汝不孤矣濤字巨源張平子東京賦若客所謂未學膚受貴耳而賤目者也魏文帝典論家有弊帚享之千金注已見劉勰辨騷楚詞者體慢於三代而風雅於戰國乃雅頌之博徒詩賦之英傑也

與王郎昆仲及兒子邁遠城觀荷花登峴山亭

晚入飛英寺分韻得月明星稀四首

吳興統記  
峴山在州

南五里本名顯山晉吳興太守段  
康於山上起顯亭後改曰峴山亭

昨夜雨鳴渠曉來風襲月蕭然欲秋意谿水清可啜環  
城三十里處處皆佳絕蒲蓮浩如海時見每一葉此閒  
真避世青蒨低白髮相逢欲相問已逐驚鷗沒

漢劉向傳熒惑襲月韓退之谿堂詩淺有蒲蓮  
深有蒹葦杜子美詩白鷗沒浩蕩萬里誰能馴

清風定何物可愛不可名所至如君子草木有嘉聲我  
行本無事孤舟任斜橫中流自偃仰適與風相迎舉杯  
屬浩渺樂此兩無情歸來兩谿間雲水夜自明

苔水如漢水鱗鱗鴨頭青吳興勝襄陽萬瓦浮青冥我  
非羊叔子愧此峴山亭悲傷意則同歲月如流星從我  
兩王子高鴻插修翎湛輩何足道當以德自銘

李白襄陽歌遙看漢水鴨頭綠恰似蒲萄新潑醅再見  
晉書羊祜傳祜樂山水每風景必造峴山置酒言詠終  
日不倦嘗慨然歎息顧謂從事鄒湛云云湛曰公德冠  
四海道嗣前哲令聞今望必與此山俱傳至若湛輩乃  
當如公言耳祜字叔子又互見十一卷登  
常山絕頂詩註兩王子謂王適王適也

吏民憐我懶鬪訟日已稀能為無事飲可作不夜歸復  
尋飛英游盡此一寸暉撞鐘履聲集顛倒雲山衣我來

無時節杖屨自推扉莫作使君看外似中已非

李德裕獻替記出  
不至遠歸不近夜

### 城南縣尉水亭得長字

兩尉鬱相望東西百步場揮旗蒲柳市伐鼓水雲鄉已  
作觀魚檻仍開射鴨堂全家依畫舫極目亂紅粧漱漱  
波頭細疎疎雨腳長我來閑濯足谿漲欲浮林澤國山  
園裏孤城水影傍欲知歸路處葦外記風檣

王注百步場尉司教閱處也揮旗伐鼓以言尉之事蒲  
柳市水雲鄉則言湖州也唐孟郊為溧陽尉開射鴨堂

左傳隱五年春公將如棠觀魚杜子美詩幾時來翠節  
特地引紅粧又詩雨腳如麻未斷絕劉禹錫詩山園故  
國周遭在李涉潤州  
詩孤城吹角水茫茫

### 與胡祠部游法華山

陂湖欲盡山為界始見寒泉落高派道人未放泉出山  
曲折虛堂瀉清快使君年老尚兒戲綠棹紅船舞澎湃  
一笑翻杯水濺君餘歡濯足波生隘長松攬天龍起立  
蒼藤倒谷雲崩壞仰穿蒙密得清曠一覽震澤吁可怪  
誰云四萬八千頃渺渺東盡日所矚歸塗十里盡風荷

清唱一聲聞露殢

公自注是日樂工有作此聲者

嗟予少小慕真隱白

髮青衫天所械忽逢佳士與名山何異枯楊便馬疥君

猶鸞鶴偶飄墮六翮如雲豈長鍛不將新句紀茲游恐

### 負山中清淨債

漢司馬相如賦上林賦八川分流洶湧澎湃抒情詩李  
相蔚鎮淮南祖送孫處士舟子回篙濺水近坐妓濕衣  
孫為楊柳調曰從教水濺羅帶濕還道朝來行雨歸又  
見九峯蘇州閭丘江君詩注作李紳裴餘慶事姑竝存  
之魯靈光殿賦吁可畏乎其駭人也後漢周舉傳上已  
梁商燕于洛水酒闌唱罷繼以殢露之歌坐者皆為掩  
涕南史宋何尚之致仕於方山為退居賦以明所守後  
還攝職袁淑乃錄古來隱士有迹無名者為真隱傳以



嗤焉揚子鷗，明冲天不在六翮乎？牧而傳尸，  
鳩其累矣。夫謝宣遠答靈運詩：鐵翎周數仞。

又次前韻贈賈耘老

具區吞滅三州界，浩浩湯湯納千派。從來不著萬斛船，  
一葦漁舟恣奔快。仙壇古洞不可到，空聽餘瀾鳴湃湃。  
今朝偶上法華嶺，縱觀始覺人寰隘。山頭臥碣弔孤冢，  
下有至人僵不壞。空餘白棘網秋蟲，無復青蓮出幽怪。  
我來徙倚長松下，欲掘茯苓親洗曬。聞道山中富奇藥，  
往往靈芝雜葵薺。詩人空腹待黃精，生事只看長柄械。

公自注子美詩云長鏡長鏡  
白水柄我生托子以為命

今年大熟期一飽食葉微

蟲真癬疥

公自注今歲有小  
蟲食葉不甚為害

白花半落紫穠香攘臂欲

助磨鎌鋤安得山泉變春酒與子一洗尋常債

周禮東南曰揚州其山鎮曰會稽其澤藪曰具區蘇州  
圖經具區接蘇常湖秀四州界內有大小山七十二洞  
庭居其一焉十道記太湖廣三萬六千頃下有地道潛  
通巴陵昔龍威丈人之所居法華經有人聞是品能隨  
喜讚善者是人口中常出青蓮香按湖州法華山昔有  
樵夫入山得青蓮一枝蓋生於平陸因持入市市人以  
花生非時且異其事乃從樵夫還至本處掘地視之下  
有石匣中藏一童子舌根不壞花自舌出是人生持誦  
法華經致此勝果故以名其山事具寺碑牛僧孺有幽  
怪錄史記龜策傳下有伏靈上有兔絲所謂伏靈者在

兔絲之下狀似飛鳥之形又伏靈者千歲松根也伏靈與茯苓同杜子美放歌行知子松根是茯苓遲暮有意來同煮又詩酒債尋常行處有三國孫濟權之叔也嗜酒不治產常醉屢欠酒緒人皆笑之濟恬然自若謂人曰尋常行坐處欠人酒債欲貸此緼袍償之

### 趙閱道高齋

冷齋夜話趙閱道休官歸老三衢作高齋居之與鍾山佛慧禪師為

方外  
交

見公奔走謂公勞聞公隱退云公高公心底處有高下夢幻去來隨所遭不知高齋竟何義此名之設緣吾曹公年四十已得道俗緣未盡餘伊輩功名富貴俱逆旅

黃金知繫何人袍超然已了一大事挂冠而去真秋毫  
坐看猿猱落置罔兩手未肯置所操乃知賢達與愚陋  
豈直相去九牛毛長松百尺不自覺企而羨者蓬與蒿

我欲羸糧往問道未應舉臂詞

一作

盧敖

法華經諸佛出世唯以一大事因緣故出現於世晉華  
譚傳或問譚曰諺言人之相去如九牛毛寧有是乎譚  
曰即許由巢父讓天子之貴市道小人爭半錢之利此  
之相去何啻九牛毛也漢司馬遷傳若九牛亡一毛韓  
退之詩自慙青蒿倚長松莊子庚桑楚南榮越羸狼七  
日七夜至老子之所淮南子盧敖游乎北海遇一若士  
敖自謂觀乎六合之外若士舉臂而竦身遂  
入雲中敖歎曰猶黃鵠之與壤蟲不亦悲哉

送俞節推

公自注尚之子尚字退翁按俞節推名溫父湖州烏程人父汝尚字退翁

第進士僉書劍南西川判官趙清獻公守蜀入輒相對清談竟暮王介甫當國患一時故老不同已或言退翁清望可真之御史即召諸京師既知所以薦用意力解得免還家苦貧又從清獻於青州遂以屯田郎中致仕子由寄其詩首云不作清時言事官歸逾年忽告其妻黃曰人生七十者稀吾與夫人皆以過之可往矣黃曰我先去退翁曰善後三日黃沐浴化去退翁明日召諸子告曰吾亦行矣俄隱几而終孫莘老以為事類龐公表其墓而秦少游為書之

吳興有君子淡如朱絲琴一唱三太息至今有遺音嗟

余與夫子相避如辰參

公自注退翁官於蜀余在京師余歸而退翁去及余官於吳興

則退翁亡矣

猶喜見諸郎竊然清且深異時多良士末路喪

初心我生不有命其肩枉尺尋

揚子吾不賭參辰之相比也孟東野出門行參辰出沒不相待我欲橫天無羽翰

次韻答孫侔

孫侔字少述湖州人

十年身不到朝廷欲伴騷人賦落英但得低頭拜東野  
不辭中路伺淵明艤舟苔雪人安在卜築江淮計已成  
千里論交一言足與君蓋亦不須傾

韓退之辭留東野詩低頭拜東野願得始終如駝蛭音  
陶潛傳刺史王弘造之潛稱疾不見弘令人候之密知  
當往廬山乃齋酒先於半道要之潛既遇酒便引酌野  
亭欣然忘進弘乃出與相見遂歡宴窮日後漢范式傳  
與張劬為友二人並告歸鄉里式謂劬曰後二年當過  
拜尊親見孺子劬勉期候之母曰二年之別千里結言  
何相見之審耶對曰式信  
士必不乖違至其日果至

### 重寄

陸務觀云孫少述一字正之與荆公文最  
厚故荆公別少述詩云應須一曲千回首

西去論心有幾人又云子今去此來何時後  
有不可誰予規其相予如此及荆公當國數  
年不復相聞人謂二公之交遂睽故公詩云  
云劉貢父亦有詩曰不負興公遂初賦更傳  
中散絕  
交書

凜然高節照時人不信微官解浼君  
蔣濟謂能來阮籍  
薛宣真欲吏朱雲好詩衝口誰能擇俗子疑人未遣聞  
乞取千篇看俊逸不將輕比鮑參軍

晉阮籍傳太尉蔣濟聞其有雋才而辟之籍都亭奏記  
乞迴繆恩以光清舉初濟恐籍不至得記遣卒迎之而  
籍已去濟大怒於是鄉親共諭之乃就吏竟謝病歸朱  
雲相吏事詳十五卷次韻王鞏留別詩注杜子美贈李  
白詩清新庾開  
府俊逸鮑參軍

次韻和劉貢父登黃樓見寄并寄子由二首

清派連淮上黃樓冠海隅

一作隅

此詩尤偉麗夫子計魁



梧

公自注劉  
為人短小

世俗輕瑚璉巾箱襲武夫坐令乘傳遽奔

走為儲須邂逅我已失登臨誰與俱貧貧倉氏粟身聽

治家撫會合難前定歸休試後圖腴田未可買

公自注  
本欲買

田於泗上近  
已不遂矣

窮鬼卻須呼二水何年到雙洪不受臚至

今清夜夢飛轡策天吳

公自注此  
詩寄劉

漢書張良傳贊曰聞張良之智勇以為其貌魁梧奇偉  
反若婦人女子武夫與賦珖珖通唐韻珖珖石似玉又傳  
遽驛也以車曰傳以馬曰遽韓退之送窮文結柳作車  
縛草為船載糗與張三揖窮鬼而告之云云於是上手  
稱謝燒車與船延之上坐山海經  
天吳水神也八首十尾亦曰河伯

與子皆去國十年天一隅數奇逢惡歲計拙集枯梧好

士餘劉表窮交憶灌夫不矜持漢節猶喜攬桓須清句

金絲合高樓雪月俱吟哦出新意指畫想前撫公自注

赴南京送之出東門登城上覽山川之勝自寫千言賦

新裁六幅圖

公自注近以絹自寫子由黃樓賦為六幅圖甚妙

傳看一坐聳勸

著尺書呼莫使騷人怨東游不到吳

公自注此詩寄子由

莊子徐無鬼越之流人去國期年見似人者而喜矣漢書李廣傳從大將軍青擊匈奴大將軍陰受上指以為李廣數奇恐不得所欲毋令當單于國語中飲優施起舞謂里克妻曰主孟啗我我教茲暇豫事君乃歌曰暇

豫之吾吾不如鳥鳥人皆集於苑已獨集於枯後漢劉  
表為荊州刺史愛民養士學士歸者千數漢灌夫傳士  
在已左愈貧賤尤益禮敬與鈞稠人廣衆薦寵下第士  
亦以此多之漢汲黯傳以便宜持節發河內衆以賑貧  
民蘇武傳在匈奴中伏漢節牧羊晉桓伊傳謝安將其  
須曰使君於此不凡詳見三卷陪歐陽讌西湖詩注

### 陳州與文郎逸民飲別攜手河堤上作此詩

白酒無聲滑瀉油醉行堤上散吾愁春風料峭羊角轉  
河水渺綿瓜蔓流君已思歸夢巴峽我能未到說黃州  
此生聚散何窮已未忍悲歌學楚囚

水衡記二月三月桃花水五月瓜蔓水謂瓜蔓延故以  
名左傳成九年晉侯觀於軍府見鍾儀問之曰南冠而

繫者誰也有司對曰鄭人所獻楚囚也使稅之晉王導傳過江人士每暇日相邀出新亭飲宴周覲中坐歎曰風景不殊舉目有山河之異皆相視流涕導愀然變色曰當共戮力王室克復神州何至作楚囚對泣耶

子由自南都來陳三日而別

夫子自逐客尚能哀楚囚奔馳二百里徑來寬我憂相逢知有得道眼清不流別來未一年落盡驕氣浮嗟我晚聞道款啟如孫休至言難久服放心不自收悟彼善知識妙藥應所投納之憂患場磨以百日愁冥頑雖難化鐫發亦已周平時種種心次第去莫留但餘無所還

永與夫子游此別何足道大江東西州畏蛇不下榻睡足吾無求便為齊安民何必歸故丘

史記老子傳謂孔子曰去子之驕氣與多欲態色與淫志是皆無益於子之身莊子達生篇孫休歎啟寡聞之民也注歎孔也啟開也言所見之小維摩經佛為大醫王應病與藥令得服行左傳昭三年盧蒲嬖曰余髮如此種種余奚能為金剛經衆生若干種心如來悉知楞嚴經佛告阿難今當示汝無所還地韓退之贈張功曹詩下林畏蛇食畏藥杜牧詩平生睡足處雲夢澤南州再見圖經黃州齊安郡

正月十八日蔡州道上遇雪次子由韻二首

蘭菊有生意微陽回寸根方憂集暮雪復喜迎朝暾憶

我故居室浮光動南軒松竹半傾瀉未數葵與萱三徑  
瑤草合一鉶井花溫至今行吟處尚餘履舄痕一朝出  
從仕永媿李仲元晚歲益可羞犯雪方南奔山城買廢  
圃槁葉手自掀長使齊安人指說故侯園

揚子或問子蜀人也請人曰有李仲元者不屈其意不  
累其身不夷不惠可否之間也仲元世之師也漢蕭何  
傳召平者故秦東陵侯種瓜長  
安城東瓜美故世謂東陵瓜

鉛膏染髭須旋露霜雪根不如閉目坐丹府夜自瞰誰  
知憂患中方寸寓羲軒大雪從壓屋我非兒女營平生

學踵息坐覺兩鞚溫下馬作雪詩滿地鞭箠痕佇立望  
原野悲歌為黎元道逢射獵子遙指狐兔奔蹤迹尚可  
原窟穴何足掀寄謝李丞相吾將反丘園

南史何長瑜作韻語云陸展染白髮欲以媚側室青青  
不解久星星行復出孟東野百憂詩萱草兒女花不解  
壯士憂莊子大宗師真人之息以踵衆人之息以喉王  
注李丞相指李斯蓋用牽黃犬出上蔡東門語也注已  
見

過新息畱示鄉人任師中

公自注任時知瀘  
州亦坐事對獄

昔年嘗羨任夫子卜居新息臨淮水怪君便爾忘故鄉

稻熟魚肥信清美竹陂鴈起天為黑

公自注小竹陂在縣北

桐栢

煙橫山半紫

公自注桐栢廟在縣南

知君坐受兒女困悔不先歸

弄清泚塵埃我亦失收身此行躑躅尤可鄙寄食方將

依白足附書未免煩黃耳往雖不及來有年詔恩儻許

歸田里卻下關山入蔡州為買烏犍三百尾

公自注黃州出水牛

卜居楚辭篇名九域志蔡州新息縣史記韓信傳呂后使武士縛信信曰吾悔不用蒯通之計乃為兒女子所

詐歐陽公詩何曰早收身江河一漁艇杜子美贈李四丈詩蒼苔風塵際躑躅騏驎老白足黃耳竝已見說文

捷犍也



過淮

朝離新息縣初亂一水碧暮宿淮南村已渡千山赤磨  
颶號古戍霧雨暗破驛回頭梁楚郊永與中原隔黃州  
在何許想像雲夢澤吾生如寄耳初不擇所適但有魚  
與稻生理已自畢獨喜小兒子少小事安佚相從艱難  
中肝肺如鐵石便應與晤語何止寄衰疾

公自注時家在子由處獨

與兒子  
邁南來

水經注淮水出南陽平氏縣胎簪山東北過桐栢山又  
東逕新息縣南尚書亂於河雲夢注屢見魏武故事長

史王必忠能勤  
事心如鐵石

施註蘇詩卷十七

欽定四庫全書卷

施註蘇詩卷十八

宋 蘇軾 撰

施元之原註

武進邵長蘅刪補

詩五十三首

起元豐三年庚申  
以後在黃州作

書磨公詩後

并引 磨音奴昆反香  
也 晉書有太史令郭磨

過加祿鎮南二十五里大許店休馬於逆旅祁宗  
祥家見壁上有幅紙題詩云滿院秋光濃欲滴老  
僧倚杖清松側只怪高聲問不應喚余踏破蒼苔  
色其後題云湓水僧寶磨宗祥謂余此光黃閒狂  
僧也年百三十死於熙寧十年旣死人有見之者  
宗祥言其異事甚多作是詩以識之磨公本名清  
戒俗謂之戒和尚云

磨公昔未化來往淮山曲壽逾兩甲子氣壓諸尊宿但

嗟濁惡世不受龍象蹴我來不及見悵望空遺躅霜顱  
隱白毫鑱骨埋青玉皆云似達磨隻履還西竺壁間餘  
清詩字勢頗拔俗為吟五字偈一洗凡眼肉

內典五濁惡世維摩經龍象蹴躅非驢所堪楞嚴經白  
毫宛轉五須彌鄴侯家傳李泌每導引骨節珊珊有聲  
人謂之鑱子骨晉庾亮傳將塋何充歎曰埋玉樹著土  
中使人情何能已傳燈錄達磨逝三歲魏宋雲奉使西  
域遇之於松嶺手攜隻履翩翩獨逝雲復命具奏其事  
帝令啟壙惟空棺一隻草履存焉金剛經如來有肉眼  
不

游淨居寺

并引

淨居寺在光山縣南四十里大蘇山之南小蘇山之北寺僧居仁為余言齊天保中僧惠思過此見父老問其姓曰蘇氏又得二山名乃歎曰吾師告我遇三蘇則住遂畱結菴而父老竟無有蓋山神也其後僧智顗見思於此山而得法焉則世所謂思大和尚智者大師是也唐神龍中道岸禪師始建寺於其地廣明庚子之亂寺廢於兵火至乾興中乃復而賜名曰梵天云

十載游名山自製山中衣願言畢婚嫁攜手老翠微不  
悟俗緣在失身蹈危機刑名非夙學陷穽損積威遂恐  
生死隔永與雲山違今日復何日芒屨自輕飛稽首兩  
足尊舉頭雙涕揮靈山會未散八部猶光輝願從二聖  
在一洗千劫非裴回竹溪月空翠搖煙霏鐘聲自送客  
出谷猶依依回首吾家山歲晚將焉歸

畢婚嫁後漢向長事已見九卷次韻沈長官詩注史記  
申不害之學本於黃老而主刑名又韓非喜刑名法術  
之學尚書敘乃穽孔氏云穽穿地陷獸漢司馬遷傳猛  
虎處深山百獸震恐及在穽檻之中搖尾而求食積威

約之漸也法華經稽首兩足尊行集經如來世尊福足  
慧足稱兩足尊法華經鈔世尊於靈山會上為諸大衆  
說二十八品放耨闍白毫相光照三千大千世界又天龍八部咸悉歡喜

梅花二首

春來幽谷水潺潺的皪梅花草棘間一夜東風吹石裂  
半隨飛雪渡關山

漢司馬相如傳宜笑的皪郭璞曰的皪鮮白貌也高適  
聽吹笛詩借問梅花何處落風吹一夜滿關山歐陽公  
山齋絕句正當年少惜花時日日東風吹  
石裂齊安拾遺關山岐亭路有春風嶺

何人把酒慰深幽開自無聊落更愁幸有清谿三百曲



不辭相送到黃州

戲作種松

我昔少年日種松滿東岡初移一寸根瑣細如插秧  
二年黃茅下一一攢麥芒三年出蓬艾滿山散牛羊  
不見十餘年想作龍蛇長夜風波浪碎朝露珠璣香  
我欲食其膏已伐百本桑

公自注煮松脂  
法用桑柴灰水

人事多乖

迂神藥竟渺茫竭來齊安野夾路須髯蒼會開龜蛇  
窟不惜斤斧瘡縱未得茯苓且當拾流肪釜盎百出

入皎然散飛霜槁死三彭仇澡換五穀腸清骨凝綠  
髓丹田發幽光白髮何足道要使雙瞳方卻後五百  
年騎鶴還故鄉

杜子美寄揚員外詩翻動神仙窟封題鳥獸形宣室志  
僧契虛遇人導游稚川仙府真人問曰汝能絕三彭之  
仇乎三彭道書所為彭質彭躋彭居也在人身中狀如  
小兒有須毛人既死便作鬼耳黃庭經端於蕊宮十九  
年三疊琴心化胎仙注三疊琴心三丹田也又三丹  
田各方一寸曰寸田神仙傳李根兩目瞳子皆方

萬松亭

并引

麻城縣令張毅植萬松於道周以芘行者且以名

其亭去未十年而松之存者十不及三四傷來者之不嗣其意也故作是詩

十年栽種百年規好德無人助我儀

公自注古語云一

十年之計樹之以木

百年之計樹之以德縣令若同倉庾氏亭松應長子孫

枝天公不救斧斤厄野火解憐冰雪姿爲問幾株能合抱殷勤記取角弓詩

詩大雅我儀圖之愛莫助之史記平準書爲吏者長子孫居官者以爲姓號如淳曰倉氏庾氏是也角弓用左傳季氏有嘉樹事詳見十六卷臺頭寺送宋希元注杜子美懷李白詩更尋嘉樹傳不忘角弓詩

張先生

并序

先生不知其名黃州故縣人本姓盧爲張氏所養  
陽狂垢污寒暑不能侵常獨行市中夜或不知其  
所止往來者欲見之多不能致余試使人召之欣  
然而來旣至立而不言與之言不應使之坐不可  
但俯仰熟視傳舍堂中久之而去夫孰非傳舍者  
是中竟何有乎然余以有思惟心追躡其意蓋未  
得也

熟視空堂竟不言故應知我未天全  
冒來傳舍人皆悅  
能致先生子亦賢  
脫屣不妨眠  
冀屋流澌爭看浴  
冰川  
士廉豈識桃椎妙  
妄意稱量未必然

莊子達生篇壹其性養其氣合其德以通乎物之所造  
若是者其天守全其神無卻楊子叔孫通制君臣之儀  
徵先生於齊魯所不能致者二人王注本朝新信者得  
道之異人也常汚垢佯狂畫脫屣而行夜眠冀屋中人  
莫測之又楊文公說苑曰郭忠恕大寒鑿冰而浴唐朱  
桃椎傳高士廉為益州長史備禮以請與之語不答瞪  
視而出士廉再拜曰祭酒其使我以無  
事治蜀耶乃簡條目薄賦歛州大治

陳季常所蓄朱陳村嫁娶圖

朱陳村在徐州豐  
縣白樂天詩徐州

古豐縣有村曰朱陳去縣百餘里桑麻青氈  
氈機梭聲軋軋牛驢走紛紛女汲澗中水界  
採山上薪縣遠官事少山深人俗淳有財不  
行商有丁不入軍家家守村業頭白不出門  
田中老與幼相見何欣欣一村惟兩姓世世  
為婚姻親疎居有族少長游有羣黃雞與白  
酒歡會不隔旬生者不遠別嫁娶先近隣死  
者不遠葬墳墓多遠村既安生與死不苦形  
與神所以多壽  
考往往見玄孫

何年顧陸丹青手畫作朱陳嫁娶圖聞道一村惟兩姓  
不將門戶買崔盧

歷代名畫記張懷瓘云像人之美顧得其神陸得其骨  
顧愷之陸探微也西川名畫錄趙德玄雍京人工畫車

馬人物屋亦山水天復中入蜀有朱陳村及豐沛盤車等圖至今相傳大中子任薛王劉崔盧之昏非古也何以視譜唐高士廉傳太宗以山東士人多尚閭閻嫁娶必多取貴故人謂之賣昏由是詔士廉等撰氏族志太宗曰我於崔盧李鄭無嫌今謀士勢臣何容納貨舊門向聲背實買昏為榮耶太上有立德其次立功其次立言其次有爵為卿大夫世世不絕謂之門戶反是豈不惑耶

我是朱陳舊使君  
勸耕曾入杏花村  
而今風物那堪畫  
縣吏催錢夜打門

韓退之董生行門外惟  
有吏日來徵租更索錢

少年時嘗過一村院  
見壁上有詩云  
夜涼疑有

雨院靜似無僧不知何人詩也宿黃州禪智寺  
寺僧皆不在夜半雨作偶記此詩故作一絕

佛燈漸暗饑鼠出山雨忽來修竹鳴知是何人舊詩句  
已應知我此時情

韓退之次石頭驛詩默然都不語應識此時情

初到黃州

自笑平生為口忙老來事業轉荒唐長江遶郭知魚美  
好竹連山覺筍香逐客不妨員外置詩人例作水曹郎



只慚無補絲毫事尚費官家壓酒囊

公自注檢校官例折支多得酒袋

杜子美比隣詩愛酒晉山簡能詩何水曹白樂天聽吳水部新詩明朝與向詩家道水部如今不姓何說苑鮑白令之對秦始皇曰天下官則讓賢是也天下家則世繼是也故五帝以天下為官三王以天下為家漢蓋寬饒傳韓氏易傳言五帝官天下三王家天下家以傳子官以傳賢白樂天詩況無治道術坐受官家祿

### 定惠院寓居月夜偶出

幽人無事不出門偶逐東風轉良夜參差玉宇飛木末  
繚繞香煙來月下江雲有態清自媚竹露無聲浩如瀉  
已驚弱柳萬絲垂尚有殘梅一枝亞清詩獨吟還自和

白酒已盡誰能借不辭青春忽忽過但恐懽意年年謝  
自知醉耳愛松風會揀霜林結茅舍浮浮大甌長炊玉  
漚漚小槽如壓蔗飲中真味老更濃醉裏狂言醒可怕

閉門

一作但當

謝客對妻子倒冠落佩從嘲罵

後漢祭遵傳帝幸遵營饗士卒作黃門武樂良夜罷注  
云良猶深也南史陶弘景特愛松風庭院皆植松每聞  
其響欣然為樂杜牧之晚晴  
賦倒冠落佩兮與世濶疎

### 次韻前篇

去年花落任徐州對月酣歌美清夜

公自注去年花下  
對月與張君厚王

子中兄弟飲酒  
作頻字韻詩

今年黃州見花發小院閉門風露下萬

事如花不可期餘年似酒那禁瀉憶昔扁舟泝巴峽落  
帆樊口高桅亞長江衮衮空自流白髮紛紛寧少借竟  
無五畝繼沮溺空有千篇凌鮑謝至今歸計負雲山未  
免孤衾眠客舍少年辛苦真食蓼老境安閑一作清閑如啖  
蔗饑寒未至且安居憂患已空猶夢怕穿花踏月飲村  
酒免使醉歸官長罵

陶淵明詩佳人美清夜達曙酣且歌韓退之詩大帆夜  
劃窮高桅白樂天詩何異食蓼蟲不知苦是苦啖蔗用

顧愔之事已見十六卷韓退之答張徹詩初味如啖蔗  
遂通斯建統杜子美鄭廣文詩醉即騎馬歸頗遭官長  
罵再見

安國寺浴

老來百事懶身垢猶念浴衰髮不到耳尚煩月一沐山  
城足薪炭煙霧蒙湯谷塵垢能幾何翛然脫羈梏披衣  
坐小閣散髮臨脩竹心困萬緣空身安一牀足豈惟忘  
淨穢兼以洗榮辱默歸毋多談此理觀要熟

安國寺尋春

臥聞百古呼春風起尋花柳村村同城南古寺修竹合  
小房曲檻欹深紅看花歎老憶年少對酒思家愁老翁  
病眼不羞雲母亂鬢絲強理茶煙中遙知二月王城外  
玉仙洪福花如海薄羅勻霧蓋新粧快馬爭風鳴雜珮  
玉川先生真可憐一生耽酒終無錢病過春風九十日  
獨抱漆丁看花發

孟東野樂府送花人老盡人悲花自開春秋經昭公二  
十二年劉子單子以王猛入於王城呂希哲家塾記玉  
仙觀在京城宣化門外有陳道士者修葺亭臺栽種花  
木甚盛洪福寺在京師黃魯直有同元明過洪福寺戲

題詩云洪福僧園拂紺紗舊題塵壁似昏鴉春殘已是  
風和雨更著遊人撼落花曹景宗傳騎快馬如龍與年  
少輩數十騎云云覺耳後生風鼻頭出火盧仝詩天下  
薄夫苦耽酒玉川先生也耽酒薄夫有錢恣張樂先生  
無錢養怙漠又示添丁子詩數日不  
食強人行何悲索我抱看滿樹花

寓居定惠院之東雜花滿山有海棠一株土人  
不知貴也

江城地瘴蕃草木只有名花苦幽獨嫣然一笑竹籬閒  
桃李漫山總麤俗也知造物有深意故遣佳人在空谷  
自然富貴出天姿不待金盤薦華屋朱唇得酒暈生臉

翠袖卷紗紅映肉林深霧暗曉光遲日暖風輕春睡足  
雨中有淚亦悽愴月下無人更清淑先生食飽無一事  
散步逍遙自捫腹不問人家與僧舍拄杖敲門看修竹  
忽逢絕艷照衰朽歎息無言揩病目陋邦何處得此花  
無乃好事移西蜀寸根千里不易到銜子飛來定鴻鵠  
天涯流落俱可念為飲一樽歌此曲明朝酒醒還獨來  
雪落紛紛那忍觸

周易坤卦天地變化草木蕃楚詞九歌幽獨處乎山中  
宋玉賦嫣然一笑惑陽城迷下蔡杜子美詩絕代有佳

人幽居在空谷又天寒翠袖薄日暮倚修竹又寄蘇侍  
御詩紅顏白面花映肉明皇雜錄上皇嘗登沉香亭召  
妃子時卯酒未醒高力士從侍兒扶掖而至上皇笑曰  
豈是妃子醉耶海棠睡未足耳世說王子猷嘗行過吳  
中見一士大夫家極有好竹王肩與徑造竹下諷嘯良  
久南史袁粲為丹陽尹郡南一家有竹石率爾步往直  
造竹所嘯詠自得韓退之詩誰家多竹  
門可款白樂天送春詩百花落如雪

次韻樂著作作野步

老來幾不辨西東秋後霜林且強紅眼暈見花真是病  
耳虛聞蟻定非聰酒醒不覺春彊半睡起常驚日過中  
植杖偶逢為黍客披衣閑詠舞雩風仰看落葉收松粉



俯見新芽摘杞叢  
楚雨還昏雲夢澤  
吳潮不到武昌宮

公自注黃州對岸武昌縣有孫權故宮

廢興古郡詩無數  
寂寞閑牕易粗

通解組歸來成二老  
風流他日與君同

圓覺經譬彼病目見空中花聞蟻晉殷仲堪父事注已見揚子是以過中則惕又聖人之道譬猶日之中矣不及則未過則昃三國志吳主孫權二十五年自公安都鄂改名武昌杜子美贈贊公詩與子成二老來往亦風流已見蘅按公用粗字可通上聲十卷寄劉孝叔詩問道已許談其粗與組覩叶此詩寂寞閑牕易粗通亦作上聲想必有據

二月二十六日雨中熟睡至晚強起出門還作

此詩意思殊昏昏也

卯酒困三杯  
午餐便一肉  
雨聲來不斷  
睡味清且熟  
昏昏覺還臥  
展轉無由足  
彊起出門行  
孤夢猶可續  
泥深竹雞語  
村暗鳩婦哭  
明朝看此時  
睡語應難讀

白樂天詩空腹三杯卯後酒  
遜齋閑覽白蟻聞竹雞之聲  
盡化為水今山林多有之其聲自呼為泥滑滑者是也  
歐陽公鳴鳩詩天將陰鳴鳩逐婦鳴中林鳩婦怒嘯無好音

雨晴後步至四望亭下魚池上遂自乾明寺前  
東岡上歸二首

雨過浮萍合蛙聲滿四隣海棠真一夢梅子欲嘗新拄  
杖開挑菜鞦韆不見人殷勤木芍藥獨自殿餘春

梁宗懔荊楚歲時記春節懸長繩於高木士女坐立其上共推引之以為戲名曰鞦韆涅槃經謂之胃索天寶遺事禁中呼木芍藥為牡丹論語奔而殿注在軍前曰啟後曰殿柳子厚芍藥詩歌紅醉濃露窈窕畱餘春

高亭廢已久下有種魚塘暮色千山入春風百草香市  
橋人寂寂古寺竹蒼蒼鸛鶴來何處號鳴滿夕陽

段公路北戶雜錄陶朱公養魚經云凡種魚池中有數洲令魚循環無窮如在江湖柳子厚記蒼然暮色自遠而至杜子美絕句遲日江山麗春風花草香

雨中看牡丹三首

霧雨不成點，映空疑有無。  
時於花上見，的皪走明珠。  
秀色洗紅粉，暗香生雪膚。  
黃昏更蕭瑟，頭重欲相扶。

杜子美詩：鳴雨既過，漸細微，映空搖颺如絲。飛淮南子：日薄於虞淵，是謂黃昏。杜牧之詩：醉頭扶不起。三丈日高還。

明日雨當止，晨光在松枝。  
清寒入花骨，蕭蕭初自持。  
午景發濃艷，一笑當及時。  
依然暮還歛，亦自惜幽姿。

幽姿不可惜，後日東風起。  
酒醒何所見，金粉抱青子。

花與百草共盡無妍鄙未忍汙泥沙牛酥煎落藥

洛陽貴尚錄孟蜀時兵部貳卿李昊每牡丹花開將數  
朵分遺親友以金鳳牋成歌詩以致之又以興平酥同  
贈且云俟花謝即以酥煎食之  
無素穠花也其風流貴重如此

### 次韻樂著作送酒

少年多病怯杯觴老去方知此味長萬斛羈愁都似雪  
一壺春酒若為湯

庾信愁賦且將一寸心能容萬斛愁孔子家語人之  
棄惡如湯之灌雪焉枚叔七發小飯大歡如湯沃雪

### 次韻樂著作天慶觀醮

濁世紛紛冒下臨夢尋飛步五雲深無因上到通明殿  
只許微聞玉佩音

王欽若翊聖保德傳建隆初鳳翔藍屋民張守真一日  
朝禮玉皇大殿觀其額曰通明殿不曉其旨真君曰上  
帝在無上天為諸天之尊常升金殿  
光明通徹無所不照故為通明殿

王齊萬秀才寓居武昌縣劉郎汭正與伍洲相  
對伍子胥奔吳所從渡江也

君家稻田冠西蜀擣玉揚珠三萬斛塞江流梯起書樓  
碧瓦朱欄照山谷傾家起樂不論命散盡黃金如轉燭

惟餘舊書一百車，方舟載入荆江曲。  
江上青山亦何有，伍洲遙望劉郎數。  
明朝寒食當過君，請殺耕牛壓私酒。  
與君飲酒細論文，酒酣訪古江之濱。  
仲謀公瑾不須弔，

一酹波神英烈君。

公自注杭州伍子胥廟封英烈王。

晉王濬傳武帝謀伐吳濬造船於蜀木枹蔽江而下唐李磎傳聚書至萬卷時人號李書樓杜子美詩碧瓦朱甍照城郭李太白詩天生我才必有用黃金散盡還復來杜詩萬事如轉燭又三歲如轉燭曹子建樂府中厨辦豐膳烹羊宰肥牛李詩吳姬壓酒喚客嘗杜懷李白詩何時一樽酒重與細論文

杜沂游武昌以酹醢花菩薩泉見餉二首

醅醪不爭春寂寞開最晚青蛟走玉骨羽蓋蒙珠幃不  
粧艷已絕無風香自遠淒涼吳宮闕紅粉埋故苑至今  
微月夜笙簫來翠巘餘妍入此花千載尚清婉怪君呼  
不歸定為花所挽昨宵雷雨惡花盡君應返

王注以武昌有孫權故宮故  
特用吳宮嬪嬙之魂為意耳

君言西山頂自古流白泉上為千牛乳下有萬石鉛不  
媿惠山味但無陸子賢願君揚其名庶託文字傳寒泉  
比吉士清濁在其源不食我心惻於泉非所患嗟我本



何有虛名空自纏不見子柳子餘愚汙谿山

牛乳用杜詩已見常州圖經惠山之側有錫山其山出錫古謠云有錫兵無錫寧故縣名無錫陸文學傳云陸羽品第天下水味以惠山泉為第二刻石畱山中故名陸子泉有祠堂在焉周易井卦井渫不食為我心惻九五井冽寒泉食象曰寒泉之食中正也柳子厚愚溪詩序山水之奇以余故咸以愚辱焉

陳季常自岐亭見訪郡中及舊州諸豪爭欲邀致之戲作陳孟公詩一首

孟公好飲寧論斗醉後關門防客走不妨閑過左阿君  
百謫終為賢太守老居閭里自浮沉笑問伯松何苦心

忽然載酒從陋巷為愛揚雄作酒箴長安富兒求一過  
千金壽君君笑唾汝家安得客孟公從來只識陳驚坐  
漢書游俠傳陳遵字孟公嘗過長安富人左氏飲食作  
樂司直陳崇劾奏遵乘藩車過寡婦左阿君置酒歌謳  
起舞跳梁頓仆坐上又初為京兆史日出醉歸曹事數  
廢西曹以故事謫之曰陳卿今日以某事謫遵曰滿百  
乃相聞又與張疎伯松俱以列侯歸長安疎居貧無賓  
客時時好事者從之質疑問事而遵車騎滿門酒肉相  
屬先是揚雄作酒箴遵大喜之謂疎曰吾與爾猶是矣  
足下諷誦經書苦身自約而我放意自娛浮沈俗間官  
爵功名不減於子而差獨樂顧不優耶又遵所到衣冠  
懷之惟恐在後時列侯有與遵同姓字者每至人門曰  
陳孟公坐中莫不震動既至  
而非因號其人曰陳驚坐

游武昌寒谿西山寺

連山蟠武昌，翠木蔚樊口。我來已百日，欲濟空搔首。  
坐看鷗鳥沒，夢逐麝麝走。今朝橫江來，一葦寄衰朽。  
高談反巨浪，飛屨輕重阜。去人曾幾何，絕壁寒谿吼。  
風泉兩部樂，松竹三益友。徐行欣有得，芝朮在蓬莠。  
西上九曲亭，衆山皆培塿。卻看江北路，雲水渺何有。  
離離見吳宮，莽莽真楚數。空傳孫郎石，無復陶公柳。  
爾來風流人，惟有漫浪叟。買田吾已決，乳水况宜酒。  
所須修竹林，深處

安井曰相將踏勝絕更裏三日糗

楚辭招隱士白鹿窟廬兮或騰或倚揚雄反騷橫江湘  
以南注兩部樂用孔珪兩部鼓吹語已見元次山馬論  
古人鄉無君子則與雲山為友里無君子則與松竹為  
友坐無君子則與琴酒為友論語益者三友左傳襄二  
十四年子太叔曰培婁無松柏注培婁小阜也杜子美  
詩高山之外皆培婁離騷九章滔滔孟夏兮草木莽莽  
三國孫策傳袁術嘗歎曰使術有子如孫郎死復何恨  
江表傳策雖有位號士皆呼為孫郎晉陶侃鎮武昌課  
諸營種柳唐元結傳家瀼濱乃自稱浪士及有官人以  
為浪者亦漫為官乎呼為漫郎既客樊上少長相戲更  
曰聲斐又漫浪於人間得非聲斷乎公漫久矣可以漫  
為斐元結集自釋云及家樊上漫遂顯焉注云在武昌  
縣西五里糗  
乾飯屑也

武昌銅劍歌

并引

供奉官鄭文嘗官於武昌江岸裂出古銅劍文得之以遺余冶鑄精巧非鍛冶所成者

雨餘江清風卷沙雷公躡雲捕黃虵虵行空中如枉矢  
電光煜煜燒虵尾或投以塊鏗有聲雷飛上天地入水  
水上青山如削鐵神物欲出山自裂細看兩脅生碧花  
猶是西江老蛟血蘇子得之何所為蒯綬彈鋏詠新詩  
君不見凌烟功臣長九尺腰間玉具高拄頤

漢天文志枉矢狀頭大流星地行而蒼黑望如有毛目然廣異記開元時太原武勝之嘗於靜江灘中見雷公踐雲逐地靜江夫以石投之中蛇鏗然有聲雷公飛去乃得一銅劍有文云許旌陽斬蛟第二劍李賀長平箭頭歌淒淒古血生銅花史記孟嘗君傳馮驩見孟嘗君置傳舍十日孟嘗君問傳舍長曰客何所為答曰馮先生甚貧獨有一劍耳又蒯綬每彈劍而歌注蒯如茅之類可為繩綬謂把劍之處漢匈奴傳單于朝天子於甘泉宮賜以玉具劍後漢馮異傳光武賜以采與玉具劍戰國策大冠若箕修劍拄頤

定惠院顯師為余竹下開嘯軒

嘯鳩催天明喧喧相詆譙暗蛩泣夜永唧唧自相弔飲風蟬至潔長吟不改調食土蚓無腸亦自終夕叫鳶貪

聲最鄙鵲喜意可料皆緣不平鳴慟哭等嬉笑阮生已  
麤率孫子亦未妙道人開此軒清坐默自照衝風振河  
海不能號無窮累盡吾何言風來竹自嘯

楚辭離騷恐鵲鵲之先鳴漢書譙讓注譙責也韓退之  
秋懷詩蟲弔寒夜永又吟蛩相唧唧傳玄蟬賦美茲蟬  
之純潔兮稟陰陽之微靈吸澍露之朝零聆商風而和  
鳴差羣吟以遞倡似簫管之餘音荀子蚓上食埃土下  
飲黃泉用心一也崔豹古今注蚓曰歌女莊子秋水篇  
鵲得腐鼠駕鵲過之仰而視之曰嚇西京雜記陸賈曰  
蜘蛛集而百事喜乾鵲噪而行人至韓退之送孟東野  
序凡物不得其平則鳴戰國策長歌之哀過於慟哭嬉  
笑之怒甚於裂眦孫登嘯詳見八卷惠山謁  
錢道人詩注楚辭九歌衝風起兮水橫波

石芝

并引

元豐三年五月十一日癸酉夜夢游何人家開堂  
西門有小園古井井上皆蒼石石上生紫藤如龍  
蛇枝葉如赤箭主人言此石芝也余率爾折食一  
枝衆皆驚笑其味如雞蘇而甘明日作此詩

空堂明月清且新幽人睡息來初勻了然非夢亦非覺  
有人夜呼祁孔賓披衣相從到何許朱欄碧井開瓊戶  
忽驚石上堆龍蛇玉芝紫筍生無數鐸然敲折青珊瑚



味如蜜藕和雞蘇主人相顧一撫掌滿堂坐客皆盧胡  
亦知洞府嘲輕脫終勝嵇康羨王烈神山一合五百年  
風吹石髓堅如鐵

晉祁嘉傳字孔賓少清貧好學年二十餘夜忽牕中有  
聲呼曰祁孔賓隱去來修飭人間甚苦不可諧所得未  
毛銖所喪如山崖旦而逃去晉石崇傳武帝賜王愷珊瑚  
樹愷以示崇崇便以鐵如意擊之應手而碎杜子美  
詩腰下寶玦青珊瑚韓退之詩太華山頭玉井蓮開花  
十丈藕如船冷比雪霜甘比蜜一片入口沈疴痊本草  
水蘇一名雞蘇孔叢子盧胡而笑闕子宋之愚人得燕  
石藏之以為大寶周客見之掩口盧胡而笑續神仙傳  
許碯遊盧閭間嘗醉吟曰閨苑花前是醉鄉洎翻王母  
九霞觴羣仙拍手嫌輕脫謫向人間作酒狂滔似冉反

王烈石髓詳五卷至秀州詩注按仙經神山五百年一開石髓出得而服之壽與天齊

今年正月十四日與子由別於陳州五月子由

復至齊安以詩迎之

驚塵急雪滿貂裘淚灑東風別宛丘又向邯鄲枕中見  
卻來雲夢澤南州睽離動作三年計牽挽當為十日留  
早晚青山映黃髮相看萬事一時休

異聞集開元中道人呂翁常往來邯鄲有書生姓盧與  
翁同止逆旅主人方蒸黃梁共待其熟盧生不覺長嘆  
翁問之具言生世困厄翁開囊中枕以授盧曰枕此當  
如願生俛首但記身入枕中遂至其家未幾登高第歷

臺閣出入將相五十年忽欠伸而寤黃梁猶未熟也謝  
曰先生以室吾欲耳自此不復求仕矣漢陸賈傳約過  
女極飲十日而更柳子厚別劉夢得詩  
耦耕若便遺身世黃髮相看萬事休

### 遷居臨臯亭

我生天地閒一蟻寄大磨區區欲右行不抹風輪左雖  
云走仁義未免違一作遲寒餓劍米有危炊鍼氈無穩坐

豈無佳山水借眼風雨過歸田不待老勇決凡幾個幸  
茲廢棄餘疲馬解鞍馱全家占江驛絕境天爲破饑貧  
相乘除未見可弔賀澹然無憂樂苦語不成些蘇个切

抱朴子天圓如張蓋地方如棋局天旁轉如磨推而左  
行日月右行隨天左轉譬之蟻行磨石之上磨左旋而  
蟻右去磨疾而蟻遲故不得不隨磨而左迴焉晉天文  
志亦云楞嚴經覺明空昧相待成搖故有風輪執持世  
界晉顧愷之傳桓玄與愷之同在殷仲堪坐共作危語  
玄曰矛頭淅米劍頭炊晉杜錫傳屢諫愷懷太子太子  
患之置針著錫常所坐氈中刺之流血張平子有歸田  
賦左傳昭八年史趙曰可弔也而又賀之史記張儀傳  
羣臣皆賀子獨弔何也些說文語詞也宋玉哀屈原作  
招魂楚些沈存中云今夔峽湖湘及南北江獠人凡禁  
呪句尾皆稱些乃楚人舊俗西域呪  
語末皆云娑娑訶亦三合而為些也

曉至巴口迎子由

去年御史府舉動觸四壁幽幽百尺井仰天無一席隔

牆聞歌呼自恨計之失留詩不忍寫苦淚漬紙筆餘生  
復何幸樂事有今日江流鏡面淨煙雨輕翳翳孤舟如  
鳬驚點破千頃碧聞君在磁湖欲見隔咫尺朝來好風  
色旗尾西北擲行當中流見笑眼清光溢此邦疑可老  
修竹帶泉石欲買柯氏林茲謀待君必

漢王莽傳定安公第置門衛使者監領敕阿乳母不得  
與語常在四壁中韓退之詩隔牆聞譴呼衆口極鵝鴈  
按先生有獄中寄子由詩見四十卷中杜子美復  
愁詩皁尾掣旗竿劉禹錫詩旗尾飄揚勢漸高

### 與子由同游寒谿西山

散人出入無町畦朝游湖北暮淮西高安酒官雖未上  
兩腳垂欲穿塵泥與君聚散若雲雨共惜此日相提攜  
千搖萬兀到樊口一箭放溜先鳬鷺層層草木暗西嶺  
瀏瀏霜雪鳴寒谿空山古寺亦何有歸路萬頃青玻瓈  
我今漂泊等鴻鴈江南江北無常栖幅巾不礙過城市  
欲踏徑路開新蹊公自注路有直入寒谿不過武昌者卻憂別後不忍到  
見子行迹空餘悽吾儕流落豈天意自坐迂闊非人擠  
行逢山水輒羞歎此去未免勤鹽齏何當一遇李八百

公自注李八百宅在筠州相哀白髮分刀圭

唐陸龜蒙號江湖散人莊子人間世而幾死之散人又惡知散木又彼且為無町畦亦與之為無町畦寒谿西山在鄂州武昌縣屬湖北黃州屬淮西圖經筠州高安郡潁濱遺老傳子瞻以詩得罪朝廷輟從坐謫監筠州鹽酒稅神仙傳李八百蜀人也莫知其名歷世見之時人計其年八百歲因以號之或隱山林或出市廛相傳能拄拐日八百里陳搏傳有一人青巾短褐叩陳希夷門未報條去追之見老人衣鹿皮曰此神仙李八百也動則八百里本草凡散藥有云刀圭者十分方寸匕之一堆如梧桐子大也韓退之寄周隨州詩金丹別後知傳得乞取刀圭

圭掾病身

# 次韻答子由

平生弱羽寄衝風此去歸飛識所從  
好語似珠穿一一  
妾心如膜退重重  
山僧有味寧知子  
瀧吏無言只笑儂  
尚有讀書清淨業  
未容春睡敵千鍾

杜牧之登第後過隣居老僧詩山僧尚未知名姓始羨  
空門氣味長韓退之瀧吏詩瀧吏垂手笑官何問之愚  
儂幸無負犯何由到而知華嚴經即  
以利益諸衆生而為自行清淨業

和何長官六言

作邑君真伯厚去官我豈曼容一廛願託仁政六字難  
賡變風



後漢朱震字伯厚詳十七卷林子中以詩寄文注漢兩龔傳邴曼容養志自修為官不冒過六百石輒自免去

五噫已出東洛三復願比南容學道未逢潘盎

公自注南海謂

狂為盎潘近世得道者也草書猶似楊風

後漢梁鴻傳過京師作五噫之歌已見王注元祐中廣南傑智高反至梧州有潘盎者素妻子服儒衣常持一大翼行坐獨語南越謂愚盎傑賊聞其異名而問之曰吾形貌如何盎曰汝一賊也他無所類賊怒害之法書范楊凝式善行草書時人以楊風呼之再見

石渠何須反顧水驛幸足相容長江大欲見庇探支八

月涼風

三輔舊事石渠閣在未央大殿北以藏秘書漢劉向傳  
講論五經於石渠楚辭離騷忽反顧以遊目兮將往觀  
乎四荒王注探支字是官物  
官錢有此名此亦戲言之矣

清風初號地籟明月自寫天容貧家何以娛客但知抹  
月批風

韓退之詩天容與水色此處皆綠淨  
禪宗有薄批明月細抹清風之語

青山自是絕色無人誰與為容說向市朝公子何殊馬  
耳東風

李太白詩世人聞此皆  
掉頭有如東風射馬耳

觀張師正所蓄辰砂

將軍結髮戰蠻溪，篋有殊珍勝象犀。漫說玉牀收

一作分

箭鏃，何曾金鼎識刀圭。近聞猛士收丹穴，欲助君王鑄  
褭蹠。多少空巖人不見，自隨初日吐虹蜺。

圖經辰州出丹砂其苗乃白石耳土人謂之砂牀箭鏃連林者色若鐵而瑩澈漢貨殖傳寡婦清其先得丹穴擅其利數世武帝紀太始二年詔更黃金為麟趾褭蹠史記封禪書少君言上曰祀竈則致物致物而丹沙可化為黃金沙同砂大洞鍊真寶經上品光明沙者受太陽洞通澄明正真之精氣降結紅光耀如日色

五禽言

并引

梅聖俞嘗作四禽言余謫黃州寓居定惠院遠舍  
皆茂林修竹荒池蒲葦春夏之交鳴鳥百族土人  
多以其聲之似者名之遂用聖俞體作五禽言

按梅聖俞詩集四禽言則竹雞婆餅焦提胡蘆杜鵑也一曰泥滑滑苦竹岡雨蕭蕭馬上郎馬蹏凌競雨又急此鳥為君應斷腸二曰婆餅焦兒不食爾父向何之爾母山頭化為石山頭化石可奈何遂作微禽曉不息三曰提胡蘆沽美酒風為賓樹為友山花撩亂目前開勸爾今朝千萬壽四曰不如歸去春山雲暮萬木兮參天蜀天兮何處人言有翼可歸飛安用悲啼向高樹

使君向蘄州更唱蘄州鬼我不識使君寧知使君死人

生作鬼會不免使君已老知何晚

公自注王元之自黃移蘄州聞曉鳥問其

名或對曰此名蘄州鬼元之惡之果卒於蘄

南山昨夜雨西谿不可渡谿邊布穀兒勸我脫破袴不

辭脫袴谿水寒水中照見催租瘢

公自注主人謂布谷為脫卻破袴

去年麥不熟挾彈規我肉今年麥上場處處有殘粟豐

年無象何處尋聽取林間快活吟

公自注此鳥聲云麥飯熟即快活

力作力作蠶絲一百箔瓏上麥頭昂林間桑子落願儂

一箔千兩絲繅絲得蛹飼爾雛

公自注此鳥聲云蠶絲一百箔

王元景談藪元景嘗大醉楊遵彥謂之曰何大低昂  
元景曰黍熟頭低麥熟頭昂黍麥俱有所以低昂

姑惡姑惡姑不惡妾命薄君不見東海孝婦死作三年

乾不如廣漢龐姑去卻還

公自注姑惡水鳥也俗云婦以姑虐死故其聲云

漢子定國傳東國有孝婦其姑自經死姑女告吏婦殺我母具獄上府于公以此婦養姑以孝聞必不殺也太守不聽竟論殺孝婦郡中枯旱三年後漢列女傳廣漢姜詩妻同郡龐盛之女詩母愛飲江水妻汲不時至母渴詩責而遣之妻乃寄止隣舍晝夜紡績市珍羞使鄰母以意自遺其姑久之姑怪問鄰母感慚呼還

次韻子由病酒肺疾發

憶子少年時肺病疲坐臥喊呀或終日勢若風雨過虛

陽作浮漲客冷仍下墮妻孥恐悵望膾炙不登坐終年

禁晚食半夜發清餓胃強鬲苦滿肺歛腹輒破三彭恣

啖嚙二豎冒逋播寸田可治生誰勸耕黃稔

公自注新法方田謂

黃稔為上腴

探懷得真藥不待君臣佐初如雪花積漸作櫻

桃一作珠

大隔牆聞三嚙隱隱如轉磨自茲失故疾陽唱

陰輒和神仙多歷試中路或坎坷平生不盡器痛飲知

無奈舊人眼看盡老伴餘幾個殘年一斗粟待子同春

籩云何不自珍醉病又一挫真源結梨棗世味等糠莖

耕耘當待獲願子勤自課相將賦遠遊仙語不用些

三彭注見本草左傳成十年晉景公求醫於秦秦桓公使醫緩為之未至公夢疾為二豎子曰彼良醫也懼傷我焉逃之其一曰居於育之上膏之下若我何黃庭經寸田尺宅可治生寸田為三丹田注見本草養命之藥則多君養性之藥則多臣療病之藥則多佐漢淮南厲王傳廢處蜀嚴道邛邛不食而死民歌之曰一尺布尚可縫一斗粟尚可舂兄弟二人不相容真詰紫微王夫人授許長史曰火棗交梨之樹已生君心中猶令有荆棘相雜可剪荆棘出此樹單生糠莖漢陳平傳亦食糠糲耳史記范睢傳置筮豆其前令兩點徒夾而馬食之楚辭遠游悲時俗之迫阨兮願輕舉以遠游

正月廿日往岐亭郡人潘古郭三人送余於女



王城東禪莊院

志林黃州東十五里有永安城俗謂之女王城

十日春寒不出門不知江柳已搖村  
稍聞決決流水谷盡放青青沒燒痕  
數畝荒園畱我住半瓶濁酒待君溫  
去年今日關山路細雨梅花正斷魂

唐詩岡分河勢  
斷春入燒痕深

鐵拄杖

并引

柳真齡字安期閩人也家寶一鐵拄杖如柳栗木  
牙節宛轉天成中空有簧行輒微響柳云得之浙

中相傳王審知以遺錢鏐鏐以賜一僧柳偶得之  
以遺余作此詩謝之

柳公手中黑蛇滑千年老根生乳節忽聞鏗然爪甲聲  
四坐驚顧知是鐵含簧腹中細泉語迸火石上飛星裂  
公言此物老有神自昔閩王餉吳越不知流落幾人手  
坐看變滅如春雪忽然贈我意安在兩腳未許甘衰歇  
便尋轍迹訪崆峒徑渡洞庭探禹穴披榛覓藥採芝菌  
刺虎鏹蛟蠲蛇蝎會教化作兩錢錐歸來見公未華髮

問我鐵君無恙否取出摩挲向公說

杜子美桃竹杖引出入瓜甲鏗有聲莊子在宥黃帝立  
為天子十九年令行天下聞廣成子在於空同之上故  
往見之韻語秋陽崆峒山汝州岷俱有之杜詩云崆峒  
小麦熟則岷州之崆峒也黃帝往空同乃汝州之空同  
也漢司馬遷傳南游江淮上會稽探禹穴漢書鍛殺吳  
王周禮以時獨魚鼈龜蜃說苑干將莫邪斬羽截鐵刺  
鐘不錚此至利也使之補履曾不如兩錢之錐東方朔  
別傳亦云桂苑叢談李德裕贈僧方竹杖及再見問杖  
無恙否曰已規而漆之矣公嗟惋久之風俗通恙毒  
蟲也喜傷人古人草居露宿故相勞問必曰無恙

與潘三失解後飲酒

千金弊帚人誰買半額蛾眉世所妍顧我自為都眊矐

憐君欲鬪小嬋娟青雲豈易量他日黃菊猶應似去年  
醉裏未知誰得喪滿江風月不論錢

後漢馬廖傳城中好廣蓄四方且半額國史補進士不  
捷而飲謂之打盹睞孟東野嬋娟篇花嬋娟泛春泉妓  
嬋娟不長妍李太白詩  
清風明月不用一錢買

乾  
坤  
萬  
物  
歸  
一  
理

施註蘇詩卷十八

欽定四庫全書

集部

施註蘇詩卷

十九  
二十

詳校官庶吉士

臣李傳熊

檢討

臣

何思鈞覆勘

覆校官中書

臣

宋

鎔

校對官主事

臣

龔敬身

謄錄貢生

臣

李廷對

欽定四庫全書

施註蘇詩卷十九

宋 蘇軾 撰

施元之原註

武進邵長蘅刪補

詩七十三首

時在黃  
州作

東坡八首

并引按東坡在黃岡山下州治東  
百餘步先生儋耳手澤云杞人馬

正卿作太學生清苦有氣節學者既不喜  
博士亦忌之余少時偶至其齋中書杜子  
美秋雨嘆壁上初無意也而正卿即日辭  
歸不復出至今白首窮餓守節如故詩中  
馬生即  
其人也

余至黃州二年日以困匱故人馬正卿哀予乏食  
為於郡中請故營地數十畝使得躬耕其中地既  
久荒為茨棘瓦礫之場而歲又大旱墾闢之勞筋  
力殆盡釋耒而嘆乃作是詩自慰其勤庶幾來歲  
之入以忘其勞焉

廢壘無人顧，顏垣滿蓬蒿。誰能捐筋力，歲晚不償勞。獨有孤旅人，天窮無所逃。端來拾瓦礫，歲旱土不膏。崎嶇草棘中，欲刮一寸毛。喟然釋耒嘆，我廩何時高。

詩周頌亦有高廩萬億及秭

荒田雖浪莽，高庫各有適。下隰種杭稌，東原蒔棗栗。江南有蜀士，桑果已許乞。好竹不難栽，但恐鞭橫逸。仍須卜佳處，規以安我室。家童燒枯草，走報暗井出一飽。未敢期瓢飲，已可必。



晉陶潛傳公田五十頃種秫詩周頌豐年多黍多稌鄭氏云稌稻也蜀士謂王文甫也文甫嘉州犍為縣人居於武昌先生與秦太虛書云所居對岸武昌山水絕佳有蜀人王生在邑中往往為風濤所隔不能歸則王生能為殺雞炊黍至數日不厭東方朔傳規以為苑

自昔有微泉來從遠嶺背穿城過聚落流惡壯蓬艾去為柯氏陂十畝魚蝦會歲旱泉亦竭枯萍粘破塊昨夜南山雲雨到一犁外泫然尋故瀆知我理荒蕪泥芹有宿根一寸嗟獨在雪芽何時動春鳩行可膾

公自注蜀人貴芹芽

膾雜鳩肉為之

後漢劉平傳王扶少修節行聚落化其德注云小於鄉  
曰聚廣雅云落居也左傳有汾澮以流其惡杜子美大  
雨詩流惡邑里清陶淵明詩侵晨理荒穢

種稻清明前樂事我能數毛空暗春澤鉞水聞好語自公

注蜀人以細雨為雨毛稻初生時農夫相語稻鉞出矣分秧及初夏漸喜風葉舉

月明看露上一珠垂縷秋來霜穗重顛倒相撐拄但

聞畦隴間蚱蜢如風雨公自注蜀中稻熟時蚱蜢羣飛田間如小蝗狀而不害稻新

春便入甑玉粒照筐筥我久食官倉紅腐等泥土行當

知此味口腹吾已許

江文通別賦秋露如珠秋月如珪漢賈捐之傳太倉之粟紅腐而不可食

良農惜地力幸此十年荒桑柘未及成一麥庶可望投種未逾月覆塊已蒼蒼農夫告我言勿使苗葉昌君欲富餅餌要須縱牛羊再拜謝苦言得飽不敢忘

史記商君傳苦言樂也甘言疾也

種棗期可剝種松期可斲事在十年外吾計亦已慙十年何足道千載如風電舊聞李衡奴此策疑可學我有同舍郎官居在瀟岳

公自注李公擇也

遺我三寸甘照坐光卓

犖百栽儻可致當及春冰渥想見竹籬間青黃垂屋角  
襄陽耆舊傳李衡作宅於武陵龍陽汎洲上種橘千株  
臨終敕其子曰吾有千頭木奴不責汝衣食歲上一匹  
絹可以不貧矣南史彭城王義康傳上嘗冬月噉甘嘆  
其形味並劣義康在坐曰今年甘殊有佳者遣還東府  
取甘大供御者三寸杜子美即事詩一雙白魚不受釣  
三寸黃甘猶自青楚辭橘頌青黃雜揉文章爛兮杜子  
美詩紅稠  
屋角花

潘子久不調沽酒江南村郭生本將種賣藥西市垣古  
生亦好事恐是押牙孫家有十畝竹無時容叩門我窮  
交舊絕三子獨見存從我於東坡勞餉同一飧可憐杜

拾遺事與朱阮論吾師卜子夏四海皆弟昆

潘名大臨字邠老榮

陽人郭生名邁汾陽人

古生名耕道新平人

漢張釋之傳十年不得調漢齊悼惠王傳朱虛侯章曰臣將種也薛調無雙傳劉振女曰無雙許以妻王仙客未果而振授朱泚偽官無雙籍入掖庭仙客怨慕不已聞富平古押牙人間有心人以情告之古生作奇法取之使復為夫婦二十年杜子美絕句梅熟許同朱老喫松高擬對阮生論

馬生本窮士從我二十年夜望我貴求分買山錢我今反累生借耕輟茲田刮毛龜背上何時得成羶可憐馬生癡至今夸我賢衆笑終不悔施一當獲千

傳大士金剛經頌如龜  
毛不實似兔角無形

### 題織錦圖上回文三首

春晚落花餘碧草  
夜涼低月半枯桐  
人隨遠鴈邊城暮  
雨映疎簾繡閣空

紅手素絲千字錦  
故人新曲九回腸  
風吹絮雪愁繁骨  
淚灑縑書恨見郎

晉列女傳實滔妻蘇蕙織錦為回文旋圖詩以贈滔凡  
八百四十字再見司馬遷報任安書腸一日而九回後  
漢蔡倫傳自古書契多編以  
竹簡其用緣白者謂之為紙

羞看一首回文錦錦似文君別恨深頭白自吟悲賦客  
斷腸愁是斷絃琴

西京雜記相如晚居茂陵將聘妾文君作白頭吟自絕  
相如乃止後漢列女蔡琰傳注邕故斷琴一絃問之琰  
曰第  
四絃

姪安節遠來夜坐三首

南來不覺歲崢嶸坐撥寒灰聽雨聲遮眼文書元不讀  
伴人燈火亦多情嗟予潦倒魚歸日今汝蹉跎已半生  
免使韓公悲世事白頭還對短燈檠

鮑明遠舞鶴賦歲崢嶸而催莫杜子美詩旅食歲崢嶸  
白樂天詩對雪畫寒灰傳燈錄有僧問藥山惟儼禪師  
和尚不許人看經因何卻自看師曰我只圖遮眼嵇叔  
夜絕交書足下舊知吾潦倒麓踈不切事情韓退之短  
燈檠歌一朝富貴還自恣長檠高張照朱  
翠吁嗟世事無不然牆角君看短檠棄

心衰面改瘦崢嶸相見惟應識舊聲  
永夜思家在何處  
殘年知汝遠來情  
畏人默坐成癡鈍  
問舊驚呼半死生  
夢斷酒醒山雨絕  
笑看饑鼠上燈檠

識舊聲暗使後漢夏馥事詳十二卷子由將赴南都詩  
註韓退之示姪孫湘詩知汝遠來應有意杜子美詩問  
舊半為鬼驚  
呼熱中腸



落第汝為中酒味吟詩我作忍饑聲便思絕粒真無策  
苦說歸田似不情腰下牛閑方解佩洲中奴長足為生  
大弔一弛何緣穀已覺翻翻不受檠

唐李廓落第詩氣味如中酒情懷似別人陸龜蒙杞菊賦序忍飢誦經豈不知屠沽兒有酒食耶木奴用李衡洲上種橘事注見本卷韓退之詩大弔挂壁無由彎漢蘇武傳能網紡繳檠弓弩顏師古曰檠謂輔正弓弩也

冬至日贈安節

我生幾冬至少小如昨日當時事父兄上壽拜脫膝十  
年閱凋謝白髮催衰疾瞻前惟兄三顧後子由一近者

隔濤江遠者天一壁今朝復何幸見此萬里姪憶汝總  
角時啼笑為梨栗今來能慷慨志氣堅鐵石諸孫行復  
爾世事何時畢詩成卻超然老淚不成滴

楚辭離騷瞻前而顧後兮相觀人之計極  
陶淵明責子詩通子垂九齡但覓梨與栗

岐亭道上見梅花戲贈李常

蕙死蘭枯菊亦摧返魂香入嶺頭梅數枝殘綠風吹盡  
一點芳心雀啁開野店初嘗竹葉酒江雲欲落豆稽灰  
行當更向釵頭見病起烏雲正作堆

東方朔十洲記聚窟洲有返魂香死屍於地聞之即活  
杜子美詩啁雀爭枝墜又詩雀啄江頭楊柳花張協七命  
豫北竹葉注云竹葉清宜城九醞酒也文酒清話王勉  
秀才上吉水縣大夫雪詩上天燒下豆稽灰烏李須教  
做白  
梅

樂全先生生日以鐵拄杖為壽二首

先生真是地行仙住世因循五百年每向銅人話疇昔  
故教鐵杖鬪清堅入懷冰雪生愁思倚壁蛟龍護晝眠  
遙想人天會方丈衆中驚倒野狐禪

楞嚴經有十種仙堅固服餌而不休息食道圓成名地  
行仙法華經正法住世二十小劫像法亦住二十小劫

銅人用薊子訓摩挲銅人事注再見韓退之赤藤杖歌  
空堂晝眠倚戶牖飛電著壁搜蛟螭傳燈錄佛為人天  
師又百丈山大智禪師每日上堂有一老人隨衆聽法  
一日衆散老人不去師問之老人曰我非人也過去生  
中曾住此山有學人問大修行底人還落因果也無對  
曰不落因果遂墮在野狐身今請和尚代一轉語師曰  
汝但問老人便問師曰不昧因果老  
人言下大悟告辭曰今已免野狐身

二年相伴影隨身踏遍江湖草木春  
擿石舊痕猶作眼  
閉門高節欲生鱗畏塗自衛真無敵  
捷徑爭先卻累人  
遠寄知公不嫌重  
筆端猶自幹千鈞

莊子達生篇夫畏塗者十殺一人則父子兄弟相戒也  
必盛卒徒而後敢出焉楚辭離騷何桀紂之昌披兮夫

惟捷徑以寗步鮑明遠城東橋  
詩爭先萬里途各事百年身

杭州故人信至齊安

昨夜風月清夢到西湖上朝來聞好語扣戶得吳餉輕  
圓白曬荔脆醎紅螺醬更將西菴茶勸我洗江瘴故人  
情義重說我必西向一年兩僕夫千里問無恙相期結

書社

公自注故人相約醵錢  
顧僕夫一歲再至黃

未怕供詩帳

公自注僕頃  
以詩得罪有

司移杭取境內所留詩杭  
州供數百首謂之詩帳

還將夢魂去一夜到江漲

公自

注江漲杭  
州橋名

蔡君謨荔枝譜福州舊貢紅鹽密煎二種慶歷初知州沈邈以道遠不可致減紅鹽之數而增白曬者

### 送牛尾狸與徐使君

公自注時大雪中

風卷飛花自入帷一樽遙想破愁眉泥深厭聽雞頭鶻

公自注蜀人謂泥滑滑為雞頭鶻

酒淺欣嘗牛尾狸通印子魚猶帶骨

披綿黃雀漫多脂殷勤送去煩纖手為我磨刀削玉肌

後漢梁冀傳妻孫壽作愁眉啼粧王彥輔塵史閩中鮮食最珍者子魚也割之則子滿腹莆田迎仙鎮乃其出處予按部過之驛左有一祠謂之通應廟下有水曰通應谿日受潮汐訪諸土人為鹹淡水不相入處此魚最良故謂之通應子魚比見士大夫賦詩多曰通印以目其魚之大小如王荆公送元厚之知福唐詩云長魚俎

上通三印荆公博學多聞豈自有所稽耶  
黃雀出江西臨江軍土人謂脂厚為披綿

四時詞

春雨陰陰雪欲落東風和冷驚簾幙漸看遠水綠生漪  
未放小桃紅入萼佳人瘦盡雪膚肌眉斂春愁知為誰  
深院無人剪刀響應將白紵作春衣

謝靈運詩山桃發紅萼杜子美蚤春詩紅入桃花嫩青  
歸柳葉新張籍白紵歌皎皎白紵白且鮮將作春衣稱  
少年裁縫長短不能  
定自持刀尺向姑前

垂柳陰陰日初永蔗漿醅粉金盤冷簾額低垂紫燕忙

蜜脾已滿黃蜂靜高樓睡起翠眉頰枕破斜紅未肯勻  
玉腕半揎雲碧袖樓前知有斷腸人

宋玉招魂濡鬢炮羔有柘漿些注柘諸蔗也取諸蔗之汁以為漿飲也杜子美入秦行蔗漿歸厨金盃凍孟郊莎柵聯句此處不斷腸定知無斷處

新愁舊恨眉生綠粉汗餘香在蘄竹象牀素手熨寒衣  
爍爍風燈動華屋夜香燒罷掩重局香霧空濛月滿庭  
抱琴轉軸無人見門外空聞裂帛聲

杜子美白紵行象牀玉手亂殷紅萬草千花動凝碧美人細意熨帖平裁縫滅盡針線跡戰國策孟嘗君至楚



獻象牀白樂天琵琶行轉軸撥  
絃三兩聲又四絃一聲如裂帛

霜葉蕭蕭鳴屋角黃昏陡

一作斗

覺羅衾

一作衣

薄夜風搖

動鎮帷犀酒醒夢回聞雪落起來呵手畫雙鴉醉臉輕

勻襯眼霞真態生香誰畫得玉奴纖手嗅梅花

杜牧之秋娘詩虎睛珠絡襌金盤犀鎮帷南部烟花記  
虞世基嘲司花女袁寶兒詩學畫鴉兒半未成杜牧之  
閨情詩娟娟却月眉新鬢學鴉飛牛  
僧孺周秦行紀楊太真自稱為玉奴

太守徐君猷通守孟亨之皆不飲酒以詩戲之

徐君猷名大受東海人孟亨之名震東平人  
舉進士東坡來黃州二君為守倅厚禮之無

遷謫意君猷秀惠列屋杯觴流行多為賦詞  
滿去而俎坡有祭文挽詞意甚悽惻亨之寓  
毗陵坡自黃過常有同  
游僧舍詩載二十三卷

孟嘉嗜酒桓溫笑徐邈狂言孟德疑公獨未知其趣爾  
臣今時復一中之風流自有高人識通介寧隨薄俗移  
二子有靈應撫掌吾孫還有獨醒時

晉孟嘉傳未得酒中趣注已見又庾亮正旦大會州府  
人士褚裒問亮聞江州有孟嘉其人何在亮曰在坐卿  
自覓裒歷觀指嘉曰此君小異將無是乎亮欣然喜裒  
得嘉而奇嘉為裒所得陶淵明孟嘉傳高陽許詢常乘  
船近行適逢嘉過嘆曰都邑美士吾盡識之獨不識此  
人唯聞中州有孟嘉者將非是乎中聖人徐邈語再見

三國徐邈傳盧欽著書稱邈曰或問欽徐公當武帝時人以為通自在涼州及還京師人以為介何也欽曰往毛孝先崔季珪用事貴清素之士于時皆變易車服以求名高而徐公不改其常故人以為通比來天下奢靡轉相倣效而徐雅尚自若不與俗同故前日之通乃今日之介也是世人之無常而徐公之有常也史記屈原傳舉世混濁而我獨清衆人皆醉而我獨醒

雪後到乾明寺遂宿

門外山光馬亦驚  
堦前屐齒我先行  
風花誤入長春苑  
雲月長臨不夜城  
未許牛羊傷至潔  
且看鴉鵲弄新晴  
更須攜被留僧榻  
待聽推簷瀉竹聲

太平寰宇記長春宮在同州朝邑縣強梁原上周武帝保定五年宇文護所築尉遲偓中朝故事長春宮園林繁茂花木無所不有芳菲長如三春節漢地理志齊地記云古有日夜出見於東萊故萊子立此城以不夜為名寰宇記不夜城在登州文登縣春秋時萊子所置邑以日出于東故以不夜為名

伯父送先人下第歸蜀詩云人稀野店休安枕  
路入靈關穩跨驢安節將去為誦此句因以為  
韻作小詩十四首送之

索漠齊安郡從來著放臣如何風雪裏更送獨歸人  
瘦骨寒將斷衰髯摘更稀未甘為死別猶恐得生歸

杜子美簡諸子詩長安苦寒誰獨悲杜陵野老骨欲折又垂老別孰知是死別

日上氣瞰江雪晴光眩野記取到家時鋤耰吾正把

月明穿破裘霜氣澀孤劍歸來閉戶坐默數來時店

韓退之喜侯喜至詩依依夢歸路歷歷想行店崔豹古今注肆所以陳貨鬻之物店所以置貨鬻之物

諸兄無可寄一語會須酬晚歲俱黃髮相看萬事休

故人如念我為說瘦樂樂尚有身為患已無心可安

詩國風棘人樂樂老子吾所以有大患者為吾有身

吾兄喜酒人今汝亦能飲一杯歸誦此萬事邯鄲枕

東阡在何許寒食江頭路哀哉魏城君宿草荒新墓

杜子美詩寒食江頭路風花高  
下飛魏城君公之配王氏也

臨分亦泣然不為窮途泣東阡時一到莫遣牛羊入

晉阮籍傳率意獨駕車  
迹所窮輒慟哭而返

我夢隨汝去東阡松柏青卻入西州門永愧北山靈

乞墦何足羨負米可忘艱莫為無車馬含羞入劍關

家語子路曰昔者由也事二親之時常食藜藿之實為  
親負米百里之外今列鼎而食願食藜藿為親負米不  
可復得也華陽國志漢司馬相如成都人蜀有升僂橋  
相如出關題其柱云大丈夫不乘駟馬車不復過此橋

後漢郭丹傳買符入函谷關慨然嘆曰丹不乘使者車終不出關去家二十年果乘高車出關

我坐名過實謹自招損汝幸無人知莫厭家山穩

越絕書名過實者滅故聖人不使名過實

竹筥與練帋隨時畢婚嫁無事苦相思征鞍還一跨

後漢戴良傳五女出嫁練裳布被竹筥木屐以遺之

萬里卻來日一菴仍獨居應笑謀生拙團團如磨驢

次韻和王鞏六首

君談陽朔山不作一錢直巖藏兩頭虺瘴落千仞翼雅

宜驩放頗訝虞舜陟暫來已可畏覽鏡憂面黑況子  
三年囚苦霧變飲食吉人終不死仰荷天地德我來黃  
岡下欹枕江流碧江南武昌山向我如咫尺春蔬黃土  
軟凍筍蒼崖坼此行我累君乃反得安宅遙知丹穴近

為斲句漏石他年分刀圭名字挂仙籍

公自注鞏許  
惠桂州丹砂

陽朔屬桂州北夢瑣言楊蘧曾至嶺外見陽朔荔浦山  
水愛之談不容口嘗謂王讚曰侍郎曾見陽朔山水乎  
瓚笑曰某未嘗打人唇綻齒折那得見之蓋非貶不去  
也漢灌夫傳平生毀程不識不直一錢韓退之永貞行  
江氣嶺侵昏若凝一蛇兩頭見未曾瘴落千仞翼本意  
用馬援飛鸞站站事注已見尚書舜陟方乃死注云升



道南巡守死於蒼梧之野白樂天惻惻吟炎瘴靈均面黧黑句漏漢縣屬交趾出丹砂

少年帶刀劍但識從軍樂老大服犂鋤解佩付鎔鑠雖無獻捷功會賜力田爵敲冰春搗紙刈葦秋織箔櫟林斬冬炭竹塢收夏籜四時俯有取一飽天所酢君生紈綺閒欲學非其脚左右玉纖纖束薪誰為縛勿令聞此語翠黛頰將惡笑我一間茅婦姑紛六鑿

韓退之會李正封聯句從軍古云樂談笑清油幕漢文帝紀遣使勞賜孝弟力田置三老孝弟力田常員周禮仲冬斬陰木仲夏斬陽木漢貨殖傳頰有拾仰有取已見趙飛燕外傳為薄眉號山黛宋玉神女賦頰薄怒以

自持兮曾不可乎犯干六  
鑿出莊子外物篇注已見

欲結千年實先摧二月花故教窮到骨要使壽無涯久  
已逃天網何須服日華賓州在何處為子上棲霞

內景經吞日月華法咒曰日魂云云十六字自有五色  
流霞入口中許端夫齊安拾遺云栖霞樓在郡城最高  
處江淮絕境也

鄰里有異趣何妨傾蓋新殊方君莫厭數面自成親默  
坐無餘事回光照此身他年赤墀下玉立看垂紳

陶淵明答龐參軍詩引俗諺云數面成親舊況其情過  
此者乎廣燈錄古德云若能回光反照漢梅福傳登文

石之陞涉  
赤墀之塗

平生我亦輕餘子晚歲人誰念此翁巧語屢曾遭蕙政  
庾詞聊復託芎藭子還可責同元亮妻郤差賢勝敬通  
若問我貧天所賦不因遷謫始囊空

杜子美題鄭十八著作詩可念此翁懷直道也霑新國  
用輕刑先生詩話云昔吾為鳳翔幕過長安見劉原父  
留吾劇飲數日酒酣謂吾曰昔陳季弼告陳元龍曰聞  
遠近之論謂明府驕而矜元龍曰夫閨門雍穆有德有  
行吾敬陳元方兄弟淵清玉潔有禮有法吾敬華子魚  
清修疾惡有識有義吾敬趙元達博文強記奇逸卓犖  
吾敬孔文舉雄姿傑出有王霸之略吾敬劉玄德所敬  
如此何驕之有餘子瑣瑣安足錄哉因仰天太息此亦

原父之雅趣也吾後在黃州作詩云平生我亦輕餘子  
晚歲人誰念此翁蓋記原父語也後漢馬援傳在交趾  
常餌薏苡軍還載之一車及卒後有人上書譖之以為  
前所載還皆明珠文犀國語晉范文子曰有秦客廋詞  
於朝注廋者隱也左傳宣十二年楚伐蕭還無社號申  
叔展叔展曰有麥麴乎曰無有山鞠窮乎曰無河魚腹  
疾奈何杜預注麥麴鞠窮所以禦濕欲使無社逃泥水  
中軍中不敢正言故謬語鞠窮即芎窮鞠音起弓切晉  
陶潛有責子詩後漢馮衍傳娶北地  
任氏女悍忌不得畜媵妾衍字敬通

君家玉臂貫銅青下客何時見目成勤把鉛黃記宮樣  
莫教絃管作蠻聲熏衣漸歎衙香少擁髻遙憐夜語清

記取北歸攜過我南江風浪雪山傾

公自注君自南江赴任不一過我

楚辭九歌滿堂兮美人忽獨與余兮目成章應物宮人  
入道詩高髻雲鬟宮樣粧世說郝隆作詩云娥偶躍清  
池桓溫問娥偶何物答曰蠻名魚也溫曰何以作蠻語  
隆曰千里投公始得蠻府參軍那不作蠻語香譜載唐  
化度寺及雍文徹郎中二衙香  
法擁髻用伶玄樊通德事已見

記夢回文二首

并引

十二月二十五日大雪始晴夢人以雪水煮小團  
茶使美人歌以飲余夢中為作回文詩覺而記其  
一句云亂點餘花唾碧衫意用飛燕故事也乃續  
之為二絕句云

酖顏玉盃捧纖纖亂點餘花唾碧衫歌咽水雲凝靜院  
夢驚松雪落空巖

趙飛燕外傳后與僂僂坐誤唾僂僂袖僂僂曰姊唾之  
染紺袖正如石上花僂僂令尚方為之未必如此衣之華  
也以為石花廣袖列子湯問篇薛譚學謳  
於秦青響過行雲顏延年詩山明望松雪

空花落盡酒傾缸日上山融雪漲江紅焙淺甌新火活  
龍團小碾鬪晴牕

三朵花 并引

房山通判許安世以書遺余言吾州有異人常戴

三朵花莫知其姓名郡人因以三朵花名之能作詩皆神仙意又能自寫真人有得之者許欲以一本見惠乃為作此詩

學道無成鬢已華不勞千劫漫烝砂歸來且看一宿覺未暇遠尋三朵花兩手欲遮瓶裏雀四條深怕井中蛇畫圖要識先生面試問房陵好事家

楞嚴經若不斷淫修禪定者如烝砂石欲其成飯經百千劫祇名熟砂傳燈錄溫州永嘉禪師初謁六祖問答相契便欲辭去祖留一宿謂之一宿覺七女經國王機惟尼有七女第二女字須臾摩游冢間言雀在瓶中復

蓋其口不能出飛今瓶已云破雀飛而去又七賢女偈  
曰雀來入瓶中羅縠掩瓶口縠穿雀飛去識神隨業走  
傳大士善慧錄亦云甯頭盧為優陀延王說法經云昔  
有人行曠野為象所逐見一邱片即入井中藏井有四  
毒蛇欲螫其身大王當知此人苦惱不可勝數九域志  
房州房陵郡

### 次韻陳四雪中賞梅

陳四即季常

臘酒詩催熟寒梅雪鬪新杜陵休嘆老韋曲已先春獨  
秀驚凡目遺英臥逸民高歌對三白遲暮慰安仁

杜子美酬裴迪蚤梅詩江邊一樹垂垂發朝夕催人自  
白頭又詩韋曲花無賴家家惱殺人楚辭招魂激楚之  
結獨秀先些逸民用袁安僵卧事已見  
吳中風俗占臘月見三白田翁笑赫赫



正月二十日與潘郭二生出郊尋春忽記去年  
是日同至女王城作詩乃和前韻

東風未肯入東門走馬還尋去歲村人似秋鴻來有信  
事如春夢了無痕江城白酒三杯釀野老蒼顏一笑溫  
已約年年為此會故人不用賦招魂

楚辭宋玉哀屈  
原作招魂章

是日偶至野人汪氏之居有神降於其室自稱  
天人李全字德通善篆字用筆奇妙而字不可

識云天篆也與余言有所會者復作一篇仍用  
前韻

酒渴思茶漫扣門那知竹裏是仙村已聞龜策通神語  
更看龍蛇落筆痕色瘁形枯應笑屈道存目擊豈非溫  
歸來獨掃空齋臥猶恐微言入夢魂

法書苑仲尼書吳季札墓志變化開合若龍蛇盤據史  
記屈原傳被髮行吟澤畔顏色憔悴形容枯槁莊子田  
子方溫伯雪子見仲尼而不言  
曰若夫人者目擊而道存矣

# 浚井

古井沒荒萊不食誰為惻  
鉗罌下兩綆蛙蚓飛百尺腥  
風被泥滓空響聞點滴上除  
青青芥下洗鑿鑿石霑濡  
愧童僕杯酒暖寒栗白水漸  
泓渟青天落寒碧云何失  
舊穢底處來新潔井在有無  
中無來亦無失

周易井渫不食為我心惻  
津陽門詩注石甕巖下有泉  
寺僧於上層樓中輓轆斜引  
綆長二百尺詩國風揚之水  
白石鑿鑿漢義縱傳為定襄  
太守郡中不寒而栗周易井  
無喪無得往來井井

紅梅三首

怕愁貪睡獨開遲自恐冰容  
不入時故作小紅桃杏色

尚餘孤瘦雪霜姿寒心未肯隨春態酒暈無端上玉肌

詩老不知梅格在更看綠葉與青枝

公自注石曼卿紅梅詩云認桃無綠

葉辨杏  
有青枝

雪裏開花卻是遲何如獨占上春時也知造物含深意

故與施朱發妙姿細雨裛殘千顆淚輕寒瘦損一分肌

不應便雜天桃杏數

一作半

點微酸已著枝

齊己蚤梅詩前村深雪裏昨夜一枝  
開宋玉好色賦著粉太白施朱太赤

幽人自恨探春遲不見檀心未吐時丹鼎奪胎那是寶

公自注朱砂紅銀  
謂之不奪胎色

玉人頰頰更多姿抱叢暗藥初含子

落盞穠香已透肌乞與徐熙新畫樣竹間璀璨出斜枝

楚辭遠遊玉色頰以艷顏兮精神粹而始壯注頰怒色  
玉人怒則頰紅故以此紅梅也沈存中筆談國初江南  
布衣徐熙墨筆畫花殊草草略施  
丹粉神氣迥出別有生動之意

和子由寄題孔平仲草菴

逢人欲覓安心法到處先為問道菴盧子不須從若士  
蓋公當自過曹參羨君美玉經三火笑我枯桑困八蠶  
猶喜大江同一味故應千里共清甘

神仙傳若士者古之仙人燕廬敖至蒙谷之山見焉方  
踞龜殼而食蛤蜊謂敖曰吾方與汗漫期九垓之外不  
可久住乃竦身入雲中漢曹參傳為齊丞相聞蓋公善  
治黃老言避正堂舍焉三火用淮南子鍾山之玉灼以  
爐炭三日夜語已見左太冲吳都賦鄉貢八蠶之綿交  
州記一歲八蠶出日南晉安海物異名記八蠶綿者八  
蠶共作一綿華嚴經譬如衆水  
皆同一味隨器異故水有差別

## 二蟲

君不見水馬兒步步逆流水大江東流日千里此蟲趯  
趯長在此君不見鷄濫堆決起隨衝風隨風一去宿何  
許逆風還落蓬蒿中二蟲愚知俱莫測江邊一笑無人

識

杜子美詩鴈兒爭水馬毛詩嚶嚶草蟲趨趨阜螽注趨  
趨躍也方言阿如軋亦名鷄濫堆莊子逍遙游蜩與鷺  
鳩笑之曰我決起而飛搶榆枋又之二蟲又何知

陳季常見過三首

陳季常名慥父希亮字公弼其先自京兆遷於眉公弼知

鳳翔公始筮仕為簽書判官相從二年公至黃季常數從之游既為公弼作傳又為季常

作方山

子傳

仕宦常畏人退居還喜客君來輒館我未覺雞黍窄東  
坡有奇事已種十畝麥但得君眼青不辭奴飯白

晉阮籍傳能為青白眼見禮俗之士以白眼對之嵇康造焉乃見青眼杜子美入秦行為君酤酒滿眼沽與奴

白飯馬

送君四十里只使一帆風江邊千樹柳落我酒杯中行非遠別此樂固無窮但願長如此來往一生同

聞君開龜軒東檻俯喬木人言君畏事欲作龜頭縮我知君不然朝飯仰賜谷餘光幸分我不死安可獨

盧仝月蝕詩北方寒龜被蛇縛藏頭入殼如入獄再見賜谷用內景經吞日華事注見本卷史記甘茂傳貧人女與富人女會績貧女曰我無以買燭而子之燭光幸有餘子可分我餘光無損子明而得一斯便焉韓退之



文我得祕藥不可獨  
不死詳見十二卷

寒食雨二首

自我來黃州已過三寒食年年欲惜春春去不容惜今  
年又苦雨兩月秋蕭瑟臥聞海棠花泥汙燕脂雪暗中  
偷負去夜半真有力何殊病少年病起頭已白

莊子大宗師藏舟於壑藏山於澤謂  
之固矣然而夜半有力者負之而走

春江欲入戶雨勢來不已小屋如漁舟濛濛水雲裏空  
庖煮寒菜破竈燒涇菰那知是寒食但感烏銜紙君門

深九重墳墓在萬里也擬哭途窮死灰吹不起

白樂天寒食吟風吹曠野紙錢飛宋玉九辯君之門兮  
九重杜子美詩此身醒復醉不擬哭途窮漢韓安國傳  
死灰獨不復然乎

### 徐使君分新火

臨臯亭中一危坐三見清明改新火溝中枯木應笑人  
鑽斫不然誰似我黃州使君憐久病分我五更紅一朶  
從來破釜躍江魚只有清詩嘲飯顆起攜蠟炬遶空屋  
欲事煎烹無一可為公分作無盡燈照破十方昏暗鎖

漢東方朔傳捐薦去几危坐而聽周禮司燿掌行火之政令四時變國火韋慎微咸鎬故事清明日尚食內園官小兒於殿前鬪鑽新火先進者賜絹三匹椀一口尋以新火賜宰臣以下盧仝詩不堪鑽斫為天下卜溝中用莊子百年之木其斷在溝中語已見躍魚暗使范丹釜中生魚事注再見飯顆詳見十三卷答孔周翰詩注韓退之石鼎聯句巧匠琢山骨剗中事煎烹華嚴經譬如一燈燃百千燈其本一燈無滅無盡維摩經天女問維摩詰我等云何住魔宮摩詰云有法門名無盡燈譬如一燈燃百千燈冥者皆明明終無盡

次韻答元素

并引 元素姓楊氏名繪九卷有分贈元素桂花詩

余舊有贈元素詞云天涯同是傷流落元素以為今日之先兆且悲當時六客之存亡六客蓋張子

野劉孝叔陳令舉李公擇及元素與余也

不愁春盡絮隨風但喜丹砂入頰紅  
流落天涯先有識  
摩挲金秋會當同  
遽遽未必都非夢  
了了方知不落空  
莫把存亡悲六客已將地獄等天宮

劉禹錫楊柳枝詞春盡絮飛留不得  
隨風好去落誰家  
賈誼服賦識言其度注云識驗也有徵驗之書也  
漢晉春秋魏明帝徙長安銅人金秋或泣  
摩挲後漢荀子訓  
事遽遽用莊子語俱再見蔡禪師十元談了了了時無  
可了元元元處亦須訶殷勤為唱元中曲  
空裏蟾光撮得  
麼等量經阿鼻地獄與非非想天劫數苦樂等無有  
二

蜜酒歌

并引

西蜀道人楊世昌善作蜜酒絕醇釀余既得其方  
作此歌以遺之

真珠為漿玉為醴六月田夫汗流泚不如春蠶自生香  
蜂為耕耘花作米一日小沸魚吐沫二日眩轉清光活  
三日開蠶香滿城快瀉銀瓶不須撥百錢一斗濃無聲  
甘露微濁醴醕清君不見南園採花蜂似雨天教釀酒  
醉先生先生年來窮到骨問人乞米何曾得世間萬事

真悠悠蜜蜂大勝監河侯

真誥右英夫人答許長史書云玉醴金漿交梨火棗乃  
飛騰之藥唐顏魯公有與李太白保乞米帖注已見莊子  
家貧貸粟於  
監河侯再見

又一首答二猶子與王郎見和

脯青苔炙青蒲爛蒸鵝鴨乃瓠壺煮豆作乳脂為酥高  
燒油燭斟蜜酒貧家百物初何有古來百巧出窮人搜  
羅假合亂天真詩書與我為麴蘖醞釀老夫成搢紳質  
非文是終難久脫冠還作扶犁叟不如蜜酒無燠寒冬

不加晷夏不酸老夫作詩殊少味愛此三篇如酒美封  
胡羯末已可憐不知更有王郎子

盧氏雜說鄭餘慶召親朋食敕家人曰爛蒸去毛勿拗  
折項客謂必鵝鴨也良久每人前栗飯一甌蒸壺盧一  
枚公食美甚諸人強進而罷山海經倭始為百巧古老  
有百無一有百巧百窮之語至今俗諺尚爾李白丹邱  
談元詩假合作容貌揚子其文是也其質非也洞仙傳  
郭璞曰吾昨夜夢在石頭外江中扶犁而耕後漢馬援  
傳過是欲少味矣晉列女傳謝道韞初適凝之還甚不  
樂叔父安曰王郎逸少子不惡汝何恨答曰一門叔父  
則有阿大中郎羣從兄弟復有封胡羯末不意天壤之  
中乃有王郎郎封謂謝歆胡謂謝朗羯謂謝元末謂謝川  
皆小字也麗情集無雙傳劉振  
妻常戲呼王仙客為王郎子

謝陳李常惠一措巾

措烏感切

夫子胸中萬斛寬此巾何事小團團半升僅漉淵明酒

二寸纔容子夏冠好戴

一作帶

黃金雙得勝休教

一本作可憐

白苧一生酸臂弓腰箭何時去直上陰山取可汗

南史陶潛酒熟取頭上葛巾漉酒訖還復著之已見漢杜欽傳字子夏茂陵杜鄴與欽同姓字俱以才能稱京師而欽目偏盲故衣冠謂欽為盲杜子夏以相別欽惡以疾見詆迺為小冠高廣纔二寸由是京師更謂欽為小冠杜子夏雙得勝世人巾裏以黃金為大環雙繫其帶謂之得勝環疑用此事亦恐自有故實姑俟知者古樂府白紵歌制以為袍餘作巾袍以光軀巾拂塵唐李靖傳突厥寇太原靖率勁騎三千趨惡陽嶺頡利可汗



大驚亡去為張寶相禽以獻於  
是斥地自陰山比至大漠矣

贈黃山人

面頰照人元自赤眉毛覆眼見來烏倦游不擬談玄牝  
示病何妨出白鬚絕學已生真定慧說禪長笑老浮屠  
東坡若冒三年住親與先生看藥爐

舊唐書毛若虛眉毛覆於眼老子玄牝之門是謂天地  
根楞嚴經攝心為戒因戒生定因定發慧是名三無漏  
學袁宏漢紀浮屠佛也西域天竺國有佛  
道焉佛者漢言覺也將以覺悟羣生也

問大冶長老乞桃花茶栽東坡

周詩記苦茶茗飲出近世初緣厭梁肉假此雪昏滯嗟  
我五畝園桑麥苦蒙翳不令寸地閑更乞茶子藝飢寒  
未知免已作太飽計庶將通有無農末不相戾春來凍  
地裂紫筍森已銳牛羊煩呵叱筐筥未敢睨江南老道  
人齒髮日夜逝他年雪堂品空記桃花裔

詩國風誰謂茶苦其甘如薺洛陽伽藍記齊王肅初好  
茗飲及歸魏高祖問茗飲何如酪漿肅曰茗不中與酪  
作奴高祖大笑因號茗飲為酪奴李肇國史補湖州有  
顧渚紫筍茶茶苑總錄改成式謝因禪師茶云忽惠荆  
州紫筍茶一角寒茸擢筍本貴含膏嫩葉抽芽方珍搗  
草詩大雅敦彼行葦牛羊勿踐履國風于以盛之維筐

施註蘇詩

及  
筭

魚蠻子

江淮水為田舟楫為室居魚鰕以為糧不耕自有餘異哉魚蠻子本非左袵徒連排入江住竹瓦三尺廬於焉長子孫戚施且侏儒擘水取魴鯉易如拾諸途破釜不著鹽雪鱗芼青蔬一飽便甘寢何異獺與狙人間行路難踏地出賦租不如魚蠻子駕浪浮空虛空虛未可知會當算舟車蠻子叩頭泣勿語桑大夫

漢五行志吳地以船為家以魚為食國語戚施不可使  
仰侏儒不可使援劉禹錫有懶吟下見盈尋魚投身擘  
洪連禮記內則芼之以萍藻古樂府有行路難曲漢武  
帝紀元光六年初算商車李奇曰始稅商賈車船令出  
算食貨志船有筭商者少物貴又異時算輅車賈人之  
緡皆有差又卜式曰縣官當食租衣稅而已今桑弘羊  
令吏坐列販物求利烹弘羊  
天乃雨弘羊嘗為御史大夫

弔李臺卿并引

李臺卿字明仲廬州人貌陋甚性介不羣而博學  
強記罕見其比好左氏有史學考正同異多所發  
明知天文律厯千載之日可坐數也軾謫居黃州

臺卿為麻城主簿始識之既罷居於廬而曹光州  
演甫以書報其亡臺卿光州之妻黨也

我初未識君人以君為笑垂頭老鶴雀煙雨霾七竅樊  
衣來過我危坐若持釣褚裒半面新酸茂一語妙徐徐  
步其瀾極望不可徼卻觀元嫵媚士固難輕料看書眼  
如月罅隙靡不照我老多遺忘得君如再少從橫通雜  
藝甚博且知要所恨言無文至老幽不耀其生世莫識  
已死誰復弔作詩遺故人庶解俗子譙

唐裴寬呼為碧鵲雀再見莊子應帝王儵與忽謂渾沌曰人有七竅以視聽食息子獨無有褚裒問孟嘉何在注見本卷左傳昭二十八年叔向適鄭駸茂惡欲觀叔向從使之收器者而往立於堂下一言而善叔向聞之曰必駸明也下執其手以上遂如故知老子常有欲以觀其微唐韻微小道也世說支道林曰北人看書如顯處視月南人學問如牖中窺日漢司馬遷傳儒者博而寡要唐蕭德言傳太宗詔裒次經史百代帝王所以興衰者上之帝愛其書博而要左傳孔子曰言之不文行之不遠老子聖人直而不肆光而不耀

曹既見和復次其韻

造物本兒嬉風噫雷電笑誰令妄驚怪失七號萬竅人走江湖一一操網釣偶然連六鼇便為此手妙空令

任公子三歲蹲海徼長貧固不詞辭一死實未料難將

著草算除用佛眼照何人嗣家學恨子兒尚少嗟我與

曹君衰老世不要空言今無救奇志後必耀吟君五字

詩義重千金弔收藏慎勿出免使羣兒譙

舊唐書杜審言傳甚為造物小兒相苦新書云造化小  
兒列子湯問篇龍伯之國有大人舉足不盈數步而暨  
五山之所一釣而連六鰲莊子外物任公子為大釣年  
綈五十牯以為餌蹲乎會稽投竿東海旦旦而釣期年  
不得魚晉載記卜崇曰所欠惟一死耳蜀志諸葛亮傳  
司馬仲達曰吾便料生不便料死也史記龜策傳能得  
百莖著草并得其下龜以卜者百言百當足以決吉凶  
金剛經如來有佛眼否傳大士頌云佛眼如千日照異

體還同左傳莊二十二年非此其身  
在其子孫光遠而自他有耀者也



施註蘇詩卷十九